

OKUSEGWALWENI.

IBIZO	2
ISABIZWANA	14
ISICHASISO	19
ISABIZWANA SOKUCHASISA	32
ISANDISO	33
ISENZO	43
ISIBANJALO	62
ISENZUKUTHI	70
IMIKHUBA LAMASIKO AMANDEBELE	72

IBIZO

Libala elikhomba ulutho esingalubona kumbe esingeke salubona.

Ukwakhiwa kwebizo

Lakhiwa ngesiqalo sebizo lesiqu sebizo.

Uluthi – ulu + thi

Ulu – yisiqalo sebiz

thi – yisiqu sebizo

Isiqalo sebizo

Yingxenye yakuqala yebizo eguqukayo nxa ibizo lisuka ebunyeni lisiya ebunengini.

Ilitshe - ili + tshe

Amatshe – ama + tshe

U ili- lo ama- yiziqalo zamabizo.

Ukwakhiwa kwesiqalo sebizo

Sakhiwa ngonkamisa wakuqala lesiqalo soqobo.

Umu – u +mu

U- unkamisa wakuqala

mu - isiqalo soqobo

umsebenzi wesiqalo sebizo

- 1) Ukuqala ibizo
- 2) Ukuveza ukiuthi ulutho lusebunyeni kumbe ebunengini

Isihlahla – lisebunyeni

Izihlahla – lisebunengini

- 3) Ukungenisa amabizo kuzigaba zawo ezehlukeneyo ezingu 15.

IMIHLOBO YAMABIZO

Amabizo nje / amabizomvelo

Ilitshe, isihlahl, inhlabathi, ububi, uluthi, amayezi, izindlu. Njll

Akhiwe ngesiqalo sebizo lesiqu sebizo.

Ububi – ubu + bi

Ubu – isiqalo sebizo

bi – isiqu sebizo

Amabizomvama

Asebenza kokwesilisa lokwesifazana ngokufanayo engehlukanisi.

Umuntu, inkomo, indwangu, imbuzi,inja

Akhiwe ngesiqalo sebizo lesiqu sebizo.

Inkomo – in + komo

In – isiqalo sebizo

Komo – isiqu sebizo

Amabizoqoqa

Aqamba izinto ezibuthelelwe ndawonye kungani yilutho olulodwa. Ziqoqiwe.

Inyanda, umhlambi, umnyaba, izinqumbi, izinqwaba, udwendwe

Akhiwe ngesiqalo lesiqu sebizo.

Udwendwe – u + dwendwe

U – isiqalo sebizo

dwendwe – isiqu sebizo

Amabizomfakela

Ngamabizo athathwa kwezinye izindimi.

Isitofu, amawindi, izimota, iphepha

Akhiwe ngesiqalo sebizo lesiqu sebizo

Isitofu – isi + tofu

Isi – isiqalo sebizo

tofu – isiqu sebizo

Amabizo nto

Ngamabizo akhomba izinto kodwa wona akhelwe ezenzweni lakuzenzukuthi.

Akhelwe ezenzweni

Kuqalwa ngesiqalo debizo esifaneleyo esiqwini sesenzo esilahla unkamisa wokucina besekujobelwa isijobelelo sebizonto u – o.

Ubhulo, umbhalo, isitshayo, amagciko, isivalo

Isi + val(a) + o – isivalo

Isi – isiqalo sebizo

Vala – isiqu sesenzo esilahla unkamisa wokucina

O – isijobelelo sebizo nto

Akhona amanye angajobeleli u –O kodwa engamabizo nto

Umhlutshwa, umsebenzi, umgayiwa

Um + sebenz(a) + i

Um – isiqalo sebizo

sebenza – isiqu sesenzo esilahla unkamisa wokucina

I – isijobelelo sebizo nto

Akhelewe kuzenzukuthi

Umkhehlekehle, isibhamu, ibhamu, amayikayika

Amayikayika - ama + yikayika

ama – isiqalo sebizo

yikayika – isenzukuthi

Amabizomuntu

Akhomba abantu ngalokho abakwenzayo. Akhelwa eziqweni zezenzo ngokuqala ngesiqalo esifaneleyo isenzo besesilahla unkamisa wokucina kujobelelwe isijobelelo sebizomuntu u –i.

Isisebenzi, abaphathi, izikhulumi, umongi, abelaphi.

Isisebenzi – isi + sebenz(a) + i

Isi – isiqalo sebizo

sebenza - Isiqu sesenzo esilahla unkamisa olahla unkamisa wokucina

I – isijobelelo sebizomuntu

Amanye amabizomuntu kajobeleli isijobelelo u-I.

Isibotshwa, umthunywa, isiphoxo

Isibotshwa – isi + botshwa

Isi – isiqalo sebizo

botshwa – isiqu sesenzo

Amabizombaxa

Ngamabizo akhiwe ngamabala apheleleyo angaphezu kwelilodwa kumbe ngezakhi thize zihamba lamabala apheleleyo.

Akhiwe ngamabala apheleleyo

Imbizimawa, umphathintambo, isikhwicamfundo, isigxingimfanekisomazwi, intathelizindaba

Kudingeka ukuthi umfundi ananzelele amabala ahlangeneyo esakha elitsha atshegise lokuthi ahlangane njani.

Imbizimawa – imbuzi + (a)mawa

Imbizi – lizibo

amawa – libizo elilahla unkamisa wakuqala

Isikhwicamfundo – isi + khwica + (i)mfundo

isi – isiqalo sebizo

khwica – isiqu sesenzo

imfundo – ibizo elilahla inkamisa wakuqala

Akhiwe ngesakhi samabizombaxa u –no

Lesisakhi singahamba lamanye amabizo alahla unkamisa wakuqala. Singahamba futhi leziqu zezenzo.

Unompembe, onozinti, unobhala

Unompembe – u + no + (i)mpembe

U – isiqalo sebizo

no – isakhi samabizombaxa

(i)mpembe – ibizo elilahla unkamisa wakuqala

Unobhala – u + no + bhala

U – isiqalo sebizo

no – isakhi samabizombaxa

bhala – isiqu sesenzo

Akhiwe ngesakhi samabizombaxa u –so

U –so- uhamaba lamanye amabizo alahla unkamisa wakuqala.

Usobizo, usomabhezimusi, osomatekisi, usogedi, usomangase

Usogedi – u + so + (i)gedi

U – isiqalo sebizo

so – isakhi samabizombaxa

Igedi – ibizo elilahla unkamisa wakuqala

Usomangase – u + so + (a)manga + se

U – isiqalo sebizo

so - isakhi samabizombaxa

amanga – ibizo elilahla unkamisa wakuqala

se – isijobelelo sebizombaxa

Akhiwa ngesakhi samabizombaxa u –ma

Lesisakhi singahamba leziqu zezenzo kumbe lamabizo alahla iziqalo.

Umathanyela, umapheka, umasawa, umabhimu

Umathanyela – u + ma + thanyela

U – isiqalo sebizo

ma – isakhi samabizombaxa

thanyela – isiqu sesenzo

umabhimu – u + ma + (ama)bhimu

u – isiqalo sebizo

ma – isakhi samabizombaxa

amabhimu – ibizo elilahla isiqalo salo

Amabizoqho

Ngamabizo esiwathumela izinto sizibize ngawo. Abonakala ngofeleba olandela isiqalo. Engaba ngamabizo lezibongo zabantu, amabizo ezifuyo, awezindawo, awemifula, izintaba lokunye nje.

Akhiwe ngesiqalo lesiqu

IHarare, uJames, iMpopoma, iLupane, iZimbabwe

IHarare – i + Harare

I – isiqalo sebizo

Harare – isiqu sebizo

Athathelwe kwamanye amabizo

Kuqalwa ngesiqalo sesigaba 1a kumbe 2a ebizweni elilahla unkamisa wakuqalalikhulise ingwaqa.

uSipho, oMelusi, uZwelo, uSifiso, uZenzo

uSipho – u + (i)sipho

s > S

u – isiqalo sebizo

isipho – ibizo elilahla unkamisa wakuqala likhulise u –s.

oMelusi – o + (u)melusi

m > M

o – isiqalo sebizo

umelisi – ibizo elilahla unkamisa wakuqala likhulise u – m

Akkelwa ezenzweni

Kuqalwa ngesiqalo sesigaba 1a kumbe 2a kukhuliswe ungwaqa kumbe unkamisa wakuqala.

uThulani, uAyanda, uDumisani, uAmukela, oSibongile, oSimangele

uThulani – u + thulani

t > T

U – isiqalo sebizo

thulani – isenzo esikhulisa u –t

Akkelwa kuzabizwana

Kuqalwa ngesiqalo sebizo isabizwana silahle unkamisa waso.

uZodwa, uThina, uLina

UZodwa – u +zodwa

z > Z

u - isiqalo sebizo

zodwa – isabizwana senani esikhulisa uZ

Akhiwe njengamabizombaxa

Angakhiwa ngamabala angaphezu kwelilodwa.

uBhekisipho, uThandolwenkosi, uSiphosethu

Umfundi kumele akhangele amabala agcweleyo asretshenzisiwe ukwakha lelobizo aveze ukuthi ahlangeane njani.

UBhekisipho – u + bheka + (i)sipho

b > B

u – isiqalo sebizo

bheka - isiqu sesenzo esikhulisa I – b

isipho – ibizo elilahla unkamisa wakuqala

UThandolwenkosi – u +(u)thando + lwenkosi

t > T

u – isiqalo sebizo

uthando – ibizo elilahla unkamisa wakuqala likhulise u T

lwenkosi – ubumnini

Angakhiwa ngesakhi samabizoqho u So

La ngamabizo esilisa. U –So uhamba lamabizo alahla unkamisa wakuqala.

uSomizi, uSobantu, uSokhaya, uSomandla

uSomizi – u + So + (i)mizi

u – isiqalo sebizo

So – isakhi samabizoqho

Imizi – ibizo elilahla unkamisa wakuqala

Angakhiwa ngesakhi samabizoqho u – No

La ngamabizo abantu besifazana. U – No uhamba lamanye amabizo alahla unkamisa wakuqala.

uNozintombi, uNomzamo, uNozipho

uNozintombi – u + No + (i)zintombi

u – isiqalo sebizo

No – isakhi samabizoqho

Izintombi – ibizo elilahla unkamisa wakuqala

Angakhiwa ngesakhi samabizoqho u – Ma.

La ngamabizo esifazana. U –Ma utsho ukuthi indodakazi “ka-” kumbe “umka-”. Uhamba lamanye amabizoqho alahla unkamisa wakuqala.

uMaSibanda, uMaDube, uMaNcube

uMaNcube – u + Ma – (u)Ncube

u – isiqalo sebizo

Ma – isakhi samabizoqho

uNcube – ibizo elilahla unkamisa wakuqala

Isinciphiso sebizo

Libizo elisebenzise isijobelelo sesinciphiso u –ana ukuveza okunye kokulandelayo:

- 1) Ubuncane kuqathaniswa lobukhulu
- 2) Ubuncane ngokuzalwa kuqathaniswa lobudala
- 3) Ubulutshwana kuqathaniswa lobunengi
- 4) Ukweyisa

Isandlana, indodana, imadlana, uchagwana, imputshana, isilonjana, ixhegwana, isalukazana.

Amanye amabizo alabondebembili labonsinini elungeni lokucina ayabalwangisa kuthi amanye angwaqazise u-o kumbe u-u wokucina.

Uchagwana – uchago + ana

o > w

uchago – ibizo elingwaqazisa u –o abe ngu –w

ana – isijobelelo sesinciphiso

isilonjana – isilond(a) + ana

nd > nj

isilonda - ibizo elilwangisa u –nd abe ngu –nj lilahle unkamisa wokucina

ana – isijobelelo sesinciphiso

Imadlana – imal(i) + ana

l > dl

imali – ibizo elinsininiza u –l abe ngu –dl lilahle unkamisa wokucina

ana- isijobelelo sesinciphiso

Isakhi u – kazi

- 1) Singasebenza njengesijobelelo sesikhuluso. Lapha siyabe siveza ukuthi ulutho okukhulunywa ngalo lukhulu kakhulu ngendlela ebabazekayo. Ibizo elilalowomqondo kuthiwa **zisikhuliso sebizo**.

Ikhandakazi, unyawokazi, isihlahlakazi, indlukazi

Ikhandakazi – ikhanda + kazi

Ikhanda – libizo

Kazi – isijobelelo sesikhuliso

Amanye amabizo ayizikhuliso angasetshenziswa ukweyisa kumbe ukuchothoza ikakhulu lawo akhomba izitho zomzimba.

Ake uvale **umlomokazi** wakho lowo.

- 2) Singasebenza siyisijobelelo sobulilikazi. Siyabe sikhomba ukuthi okukhulunywa ngakho ngokwesifazana. Amabizo aveza loaomqondo athiwa **yibulilikazi**.

Inkomokazi, umongikazi, indodakazi

Indodakazi – indoda + kazi

Indoda – libizo

Kazi – isijobelelo sobulilikazi

umsebenzi webizo

- 1) Lingaba yinhloko kumbe umenzi emutshweni
UNyathi utshaya abantwana.
- 2) Lingaba ngumenziwa emutshweni.
Imota igxobe **inja**.

IZABIZWANA

La ngamabala angasebenza endaweni yebizo enze umsebenzi walo ibizo. Siwasebenzisa uma singafuni ukuba silokhu siphindaphinda ibizo. Kulesabizwana sokukhomba, isabizwana soqobo, esenani lesokuchasisa.

Isabizwana sokukhomba

Sikhomba eduze, buqamama lakude.

Esokukhomba eduze

Sakhiwa ngesakhi sokukhomba u –la lesiqalo sebizo. Kulumbana onkamisa kuthi nxa isiqalo sebizo silomankankana simlahle lonkamisa omlandelayo.

La + isi > lesi

a+l >e

la – isakhi sokukhomba

isi – isiqalo sebizo

e – unkamisa ovele ngokulumbana kuka –a lo – i

la + u(mu) – lo

a+u> o

la – isakhi sokukhomba

umu – isiqalo sebizo esilahle umankankana lonkamisa omlandelayo

o – unkamisa odalwe ngokulumbana kuka –a lo –u

Esokukhomba buqamama

Sakhelwa phezu kwesokukhomba eduze ngokujobelela isijobelelo sokukhomba buqamama u –o.

Lol(u) + o > lolo

Lolu – isabizwana sokukhomba eduze esilahla unkamisa wokucina

O – isijobelelo sokukhomba kude

Kuzabizwana zokukhomba eduze ezingolunga linye (la, lo, le) sigaxekisa usingankamisa ofaneleyophakathi kwazo lesijobelelo sokukhomba buqamama u –o

La + w + o > lawo

Lo + w + o > lowo

Le + y + o > leyo

Le – isabizwana sokukhomba eduze

Y – isigaxekiso

O – isijobelelo sokukhomba kude

Esokukhomba kude

Sakhelwa phezu kwesokukhomba eduze ngokujobelela isijobelelo sokukhomba kude okungaba ngu - ya, -yana, -waya kumbe –wayana.

Lezi + ya > leziya

Lo + wayana > lowayana

La + waya > lawaya

Le + yana > leyana

Lo – isabizwana sokukhomba eduze

Wayana – isijobelelo sokukhomba kude

Isabizwana soqobo

Sakhiwa ngesiqalo sesabizwana lesiqu sesabizwana soqobo u –na.

Isiqalo sesabizwana

Sakhiwa ngesivumelwano senhloko esilahla unkamisa waso lesakhi sesabizwana u –o. nxa isivumelwano senhloko singunkamisa siyangwaqaziswa u –a- abe ngu –w, u – i- abe ngu y kuthi u –u- abe ngu –w.

S(i) +o > so

l(u) + o > lo

z(i) +o zo

b(u) +o > bo

Si – isivumelwano senhloko esilahla unkamisa waso

O – isakhi sesabizwana

a + o >wo

l + o > yo

u + o >wo

a>w

i>y

u>w

a – isivumelwano senhloko esingwaqaziswa sibe ngu –w

o – isakhi sesabizwana

yona, sona, khona, zona, wona, lona, bona

yo + na – yona

yo – isiqalo sesabizwana

na – isiqu sesabizwana soqobo

Zikhona ezinhlanu ezingasebenzisi isakhi sesabizwana u –o.

Mina, thina, wena, yena, lina.

Thina – thi + na

thi – isiqalo sesabizwana

na - isiqu sesabizwana soqobo

Isabizwana senani

Sakhiwe ngesiqalo sesabizwana lesiqu sesabizwana senani.

Iziqu sesabizwana senani

-nke, -dwa, -bili, -thathu, -ne, -hlanu.

Zonke, yodwa, lonke, ngedwa, wedwa, yedwa, konke

Yodwa – yo + dwa

Yo – isiqalo sesabizwana

dwa – isiqu sesabizwana senani

Nxa kusakhiwa ngeziqu ezibalayo kazizimeli zodwa kodwa zingabuya ziyiziphawulo ezilahla unkamisa wakuqala kumbe ziyizibanjalo.

Bo + (a)bane – bobane

Bo + bane – bobane

Ko + (o)kukhlanu – kokukhlanu

Ko + khlanu – kokukhlanu

Yo + (e)mibili – yomibili

Yo – isiqalo sesabizwana

Emibili – isiphawulo esilahla unkamisa wakuqala

Yo + mibili - yomibili

Yo – isiqalo sesabizwana

Mibili - isibanjalo

Ukusebenza kwesabizwana emutshweni

- 1) Singamela ibizo siyinhloko yomutsho
Zona zithanda ukuhlabela.
- 2) Singamela ibizo singumenziwa emutshweni
Umntwana lade ehlafuna **lokhu**
- 3) Singalandela ibizo emutshweni
Ukudla **konke** kudliwe yizinja
- 4) Singandulela ibizo emutshweni
Kanti **yena** uyise uthuleleni
- 5) Singalandelana lesinye isabizwa
Inkukhu ibekele **lona leli**

ISICHASISO

Ligama **elichaza** usobizo **elimlandelayo** emutshweni. Lenza umsebenzi wokuchaza. Kelesiphawulo, isibaluli, ubumnini lenani. Isichasiso siyamchaza usobizo lanxa seguquke waba yisandiso kumbe isibanjalo.

ISIPHAWULO

Sakhiwa ngesivumelwano sesiphawulo lesiqu sesiphawulo.

Isivumelwano sesiphawulo

Sakhiwa ngesakhi sokuchasisa u –a lesiqalo sebizo. Kulumbana isakhi sokuchasisa lonkamisa wakuqala wesiqalo sebizo.

a + umu > omu

a+u>o

a + ama > ami

a+a>a

a + ili > eli

a+i>e

a + Izi > eziN

a+i>e

a + uku > oku

a+u>o

a – isakhi sokuchasisa

uku – isiqalo sebizo

o – unkamisa ovele ngokulumbana kuka **a lo u**

Iziqu zesiphawulo

Zingu 15 kuphela.

-nye, -bili, -thathu, -ne, -hlanu

-khulu

-ncane

-tsha

-dala

-bi

-hle

-de

-fitshane

-nengi, -ngaka

Omuhle, okude, amatsha, elincane, obubi, oludala, ezintsha, emfitshane

Umfana **omuhle** ufunda edolobheni

Ikhandu **elincane** liyahlekisa

Amasokisi **amatsha** alahlekile

Ezintsha – ezin + tsha

Ezin – isivumelwano sesibaluli

tsha – isiqu sesiphawulo

ISIBALULI

Sakhiwa ngesivumelwano sesibaluli lesiqu sesibaluli.

Isivumelwano sesibaluli

Sakhiwa ngasakhi sokuchasisa u –a lesiqalo sebizo njengesesiphawulo. Umehluko usekuthini isivumelwano sesibaluli siyalahla omankankana labonkamisa ababalandelayo kukanti esesiphawulo siyabagcina. Lokhu kwenzakala kusigaba 1, 3, 4, 6, 9 lo 10. Kwezinye izigaba izivumelwano ziyafana.

Esesiphawulo

$a + um(u) > om(u)$

$a+u>o$

$a +imi > emi$

$a+i>e$

$a + ama>ama$

$a+a>a$

Esesibaluli

$a + u(mu)> o$

$a+u>o$

$a + i(mi) > e$

$a+i>e$

$a + a(ma) > a$

$a+a$

$a + iN > eN$

$a+i>e$

$a + i(N) > e$

$a+i>e$

$a + iziN > eziN$

$a+i>e$

$a + izi(N) > ezi$

$a+i>e$

Iziqu zesibaluli

Zinengi kakhulu. Lokhu kungenxa yokuthi isisbaluli siyakhelwa phezu kwamanye amabala apheleleyo.

Iziqu zemvelo

-qatha, -qotho, -mqoka, -mnandi, -nqunu, -banzi, -munyu etc

Ibholoho **elibanzi** lidilikile

Ukudla **okumnandi** kuphekwe ngubaba

Utshwala **obumnandi** ngobaxhegu

Obumunyu – obu + munyu

Obu - isivumelwano sesibaluli

munyu – isiqu sesibaluli

Iziqu ezikhomba imibala

-mnyama, -mhlophe, -luhlaza, -nsundu, -bomvu

Igabha **elimnyama** lilochago.

Isigqoko **esimhlophe** ngesomtshado.

Abantu **abansundu** bayazigqaja.

Abansundu – aba + nsundu

Aba – isivumelwano sesibaluli

nsundu – isiqu sesibaluli

Ezakhelwa eziqwini zezenzo

Intombi **ehlabela** kuhle ngiyayithanda.

Izinja **ezikhonkotha** abantu ziyaluma.

Ezikhonkotha – ezi + khonkotha

Ezi – isivumelwano sesibaluli

Khonkotha - isiqu sesenzo

Ezinye izibaluli ezakhelwa ezenzweni zijobelela u –yo

Ubuhle **obukhulumayo** yilobu.

Amajaha **agidayo** sediniwe

Agidayo – a + gida + yo

A + isivumelwano sesibaluli

gida – isiqu sesenzo

yo – isijobelelo sesibaluli

Ezakhelwa emabizweni

Kuqalwa ngesivumelwano sesibaluli ebizweni elilahla unkamisa wakuqala.

Ixhegu **elimpabanga** iyacazimula selilele

Bathe isikolo **esimphathi** udla imali kasitholi lutho.

Esimphathi – esi + (u)mphathi

Esi – isivumelwano sesibaluli

umphathi – ibizo elilahla unkamisa wakuqala

Ezakhelwa kuzabizwana zenani

Sicela ilanga **elilodwa**.

Isigqoko **esisodwa** kangisifuni.

Esisidwa – esi + sodwa

Esi – isivumelwano sesibaluli

sodwa – isabizwana senani

Ezakhelwa kuzibanjalo

Abafundi **abangamavila** kasibafuni.

Umfana **oyisithutha** usele phandle.

Ijaha **elililema** lixotshiwe emdlalweni.

Elililema – eli + lilema

Eli – isivumelwano sesibaluli

lilema – isibanjalo

Esakhelwe ezandisweni

Nxa isandiso siqala ngonkamisa, kugaxekiswa u –s- phakathi kwesivumelwano sesibaluli laso.

Isithombe **esiphandle** ngesikaJoji

Utshani **obuphezulu** sebubolile

Idili **elisebusuku** ngelozalwa kwakhe

Esiphandle – esi + phandle

Esi – isivumelwano sesibaluli

phandle – isandiso sendawo

Elisebusuku - eli + s + ebusuku

Eli – isivumelwano sesibaluli

S – isigaxekiso

Ebusuku – isandiso sesikhathi

UBUMNINI

Bakhiwa ngesivumelwano sobumnini lesiqu sobumnini.

Isivumelwano sobumnini

Sakhiwa ngesivumelwano senhloko esilahla unkamisa waso lesakhi sobumnini u –a

L(i) + a > la

s(i) + a > sa

z(l) + a > za

B(u) + a > ba

b(a) + a > ba

La – l(i) + a

Li – isivumelwano senhloko esilahla unkamisa waso

a – isakhi sobumnini

Nxa isivumelwano senhloko singunkamisa siyangwaqaziswa u –i- abe ngu –y, u –u- abe ngu –w. U –a- oyo isivumelwano sobumni sikasigaba 6 uyeqiwa kasebenzi, isakhi sobumnini sizazimela sodwa.

U + a > wa

l + a > ya

u>w

i>y

Kusigaba 11 lo 15, onkamisa bezivumelwano zenhloko kabalahlw kodwa bayangwaqaziswa.

Lu + a – lwa

u>w

ku + a – kwa

u>w

Iziqu zobumnini

Iziqu zemvelo

-khe, -kho, -inu, -ithu

Lwa + khe - lwakhe

Ulimi **lwakhe** luyisiNdebele esiqondileyo

Za + kho – zakho

Geza izandla **zakho** wena, zingcolile

A + ithu – ethu

a+i>e

Amanzi **ethu** setshisa, sekumele sigeze

Kwa + inu – kwenu

a+i>e

kwa – isivumelwano sobumnini

inu – isiqu sobumnini

e – unkamisa odalwe ngokulimbana kuka a lo i

Obakhelwe emabizweni

Kulumbana unkamisa wesivumelwano lowakuqala webizo.

Umlomo **wendlovu** uyesabisa

Ilihlo **lomntwana** livuvukile

Imbiza **yamabhonzo** iwiswe yinja

Wendlovu - wa + indlovu

a+i>e

wa – isivumelwano sobumnini

indlovu – libizo

e – unkamisa odaleke ngokulumbana kuka a lo i

Nxa umnini kulibizo likasigaba 1a, isivumelwano sobumnini sakhiwa ngesivumelwano senhloko lesakhi sobumnini u –ka-. Ibizo lilahla unkamisa walo wakuqala. Nxa isivumelwano senhloko singunkamisa, siyatshiywa isakhi sobumnini sisebenze sodwa.

Lu + ka – luka

ku + ka – kuka

si + ka – sika

bu + ka – buka

Zika – si + ka

zi – isivumelwano senhloko

ka – isakhi sobumnini

Unyawo **lukaSipho** lungangolwendlovu

Amanzi **kagogo** setshisa.

lukaSipho – luka + (u)Sipho

luka – isivumelwano sobumnini

uSiphi – ibizo elilahla unkamisa wakuqala

Kagogo – ka + (u)gogo

Ka – isakhi sobumnini

Ugogo – ibizo elilahla unkamisa wakuqal

Obakhelwa kuzabizwana

Kwesoqobo

Kuqalwa ngesovumelwano sobumnini isabizwana soqobo silahle isiqu u-na

Isandla **sami** sibuhlungu.

Uqhatshi **lwakho** ukudla lubukhali.

Sami – sa + mi(na)

Sa – isivumelwano sobumnini

mi(na) – isabizwana soqobo esilahla isiqu u –na

Kwesokukhomba

Umuthi **waleli** uyababa

Indaba **yaloluya** uhlanya yaphelela ngaphi

Yaloluya – ya + loluya

Ya – isivumelwano sobumnini

Loluya – isabizwana sokukhomba kude

Kusabizwana senani

Kasizimeli sodwa isabizwana senani ukuthi sakhe ubumnini kodwa seyama kubumnini obakhelwe kusabizwana soqobokumbe kobakhelwe iziqwini zemvelo.

Nxa kunje kuthiwa **ngumtswana wobumnini**.

Zabo bobathathu – za + bo(na) bobathathu

Za – isivumelwano sobumnini

Bona bobathathu – umtshwana wesabizwana soqobo esilahla isiqu l –na

Kwethu sonke – kwethu + sonke

Kwethu + sonke

Kwethu – ubumnini

Sonke – isabizwana senani

Kusabizwana sokuchasisa

Nxa isabizwana sokuchasisa siqala ngonkamisa, isivumelwano sobumnini silahla unkamisa waso.

Ulume isandla **somkhulu** umfana.

Ugqoke izicathulo **zeyakhe** intombi.

Ugijimela ukholo **lwabamhlophe**.

Udle ukudla **kwayiphi** ingane.

Somkhulu – s(a) + omkhulu

Zeyakhe – z(a) + eyakhe

Lwabamhlophe – lw(a) + abamhlophe

Lwa – isivumelwano sobumnini esilahla unkamisa waso

abamhlophe - isabizwana sokuchasisa

kwayiphi – kwa + yiphi

kwa – isivumelwano sobumnini

yiphi – isabizwana sokuchasisa

Obakhelwa ezandisweni

Nxa isandiso siqala ngonkamisa, kungagaxekiswa u –s- phakathi kwesivumelwano sobumnini lesandiso kumbe isivumelwano sobumnini silahle unkamisa was.

Abantu **baphetsheya** balomusa.

Izintombi **zasemadolobheni** zinhle.

Izintombi **zemandolobheni** zinhle.

Baphetsheya – ba + phetsheya

Ba- isivumelwano sobumnini

Phetsheya – isandiso sendawo

Zasemadolobheni – za + s + emadolobheni

Za – isivumelwano sobumni

S – isigaxekiso

Emadolobheni – isandiso sendawo

Zemandolobheni – z(a) + emadolobheni

Za – isivumelwano sobumnini esilahla unkamisa waso

Emadolobheni – isandiso sendawo

Imiqondo yobumnini

Ingagoqela elandelayo leminye eminengi.

- 1) Ulutho lusetshenziswa nini.
Izigqoko zebusuku
- 2) Ulutho lusebenza ngani
Imota yedizili
- 3) Ulutho luphatheleli
Igabha lesawudo
- 4) Ulutho lwenziwe ngani
Indlu yezitina

INANI

Lakhiwa ngesivumelwano senani lesiqu senani.

Lileziqu u **–phi?**, **–ni?** lo **–nye**.

Isivumelwano senani

Kungatshiwo ukuthi sivela kusiqalo sebizo esilahla unkamisa wakuqala.

Uthenge isigqko **siphi?**

Bathume umuntu **munye** lemibiko etshiyeneyo.

Luhleko **luni** oluzwakala phetsheya?

Siphi – si + phi

Si – isivumelwano senani

phi – isiqu senani

Uthenge isigqoko **siphi?**

Si – yisivumelwano senani

Si – (i)si

Isi – isiqalo sebizo esilahla unkamisa wakuqala

Zikhona kodwa izichasiso zenani ezisuke zisivezele ukuthi isivumelwano senani singaba yisivumelwano senhloko kumbe esika menziwa.

Baxotshe umfana **uphi?**

Baxotshe umfana **wuphi?**

Sizathenga imithi **iphi?**

Sizathenga imithi **yiphi?**

Kuchitheke amanzi **waphi?**

U – **u**- uyisivumelwano senhloko kusigaba **1 lo 3** kukanti u –**wu**- yisivumelwano sikamenziwa kulezozigaba. U –**i**- yisivumelwano senhloko kusigaba **4 lo 9** kukanti u –**yi** - yisivumelwano sikamenziwa kuzo izigaba lezo. U –**a**- yisivumelwano senhloko kusigaba **6** kukanti u – **wa** – ungesikamenziwa lapho.

Umbuzo ozafuna ozafuna wakhe isivumelwano senani uzafuna uwuphendule ngokwakha isivumelwano senhloko kumbe esikamenziwa.

Uphi – (um)u

Umu – isiqalo sebizo esilahla unkamisa wakuqala lomankankana omlandelayo.

Waphi – w + a

W – ungwaqa ophongozisiweyo

a – isivumelwano senhloko

Nxa isiqu kungu –**ni?**, isivumelwano senani singaba ngu –**ba**- kungakhethalekile isigaba.

Yisihlahla **bani** esiwileyo?

Luhleko **bani** oluzwakala phetsheya?

Badakwe butshwala **bani?**

ISABIZWANA SOKUCHASISA

Isichasiso singandulela usobizo esimchazayo kumbe simmele siba yisabizwana sokuchasisa. Singathsho ke ukuthi isabizwana sokuchasisa **ligama elichaza usobizo elimandulelayo kumbe elimmeleyo emutshweni.**

Isichasiso

Ijaha **elihle** liyathandeka

Ubhulo **oluqatha** luyasinda

Zinathe uchago luphi?

Isabizwana sokuchasisa

Elihle ijaha liyathandeka

Elihle liyathandeka

Oluqatha ubhulo luyasinda

Oluqatha luyasinda

Zinathe **luphi** uchago?

Zinathe **luphi**?

Akulalutho oluguqukayo nxa isiphawulo, isibaluli lenani kuguquka kusiba yisabizwana sokuchasisa. Kodwa nxa kuguqulwa ubumnini busiba yisabizwana sokuchasisa kuba khona inguquko ekwakheni. Kuqalwa kubo ngesivumelwano sesibaluli. Yikho kungathiwa isabizwana sokuchasisa sobumnini yibumnini besibaluli.

Nxa inhloko echazwayo iqala ngo a- isivumelwano sesibaluli esisetshenziswayo ngu a-. Nxa kuchazwa inhloko eqala ngo i- kusetshenziswa isivumelwano sesibalulo u e- kuthi nxa kuchazwa inhloko eqala ngo u- isivumelwano sesibaluli sibe ngu o-.

Abantwana **bakhe** bayiziqholo

Impabanga **kababa** isikhukulile

Umumo **welizwe** usumubi

Abakhe abantwana bayiziqholo

Abakhe bayiziqholo

Ekababa impabanga isikhulile

Ekababa isikhulile

Owelizwe umumo usumubi

Owelizwe usumubi

Owelizwe – o + welizwe

O – isivumelwano sesibaluli

Welizwe – ubumnini

ISANDISO

Ligama elenza umsebenzi wokukhanyisa.

Kulesandiso sokufunga, esokukhomba, esendawo, esesikhathi lesesimo.

Isandiso sokufunga

Izandiso zokufunga ngamabala esiwasebenzisa ukugcizelela. Ngokwenza njalo siyabe sifunga. Amgathathelwa emabizweni alahla unkamisa wakuqala kumbe athathe isimo sebibo.

Impela ungiyangisile wena mntwana.

Wena mntwana ungiyangisile **mpela**.

Ngiqinisile **sibili** angmbonanga.

Isibili ngiqinisile, angimbonanga.

Impela – im + pela

Im – isiqalo sesandiso

pela – isiqu sesandiso

mpela – (i)mpela

impela – ibizo elilahla unkamisa wakuqala

Isandiso sokukhomba

Sikhomba eduze, buqamama lakude.

A

Esokukhomba eduze

Sakhiwa ngesakhi sokukhomba u **la-** lesakhi sesandiso u- **pha**

La + pha – lapha

Esokukhomba buqamama

Sakhelwa kwesokukhomba eduze ngokususa unkamisa wokucina indawo yakhe ithathwe yisijobelelo sokukhomba buqamama u –o.

Laph(a) + o – lapho

Lapha – isandiso sokukhomba eduze esilahla unkamisa wokucina

O – isijobelelo sokukhomba buqamama

Esokukhomba kude

Sakhelwa phezu kwesokukhomba eduze ngokujobelela isijobelelo sokukhomba kude u –ya kumbe u –yana

Lapha + yana – laphayana

Lapha – isandiso sokukhomba eduze

Yana – isijobelelo sokukhomba kude

B

Esokukhomba eduze

Sakhiwa ngesakhi sesandiso u –**nga** – lesakhi sesandiso l – **pha**

nga + pha – ngapha

nga – isakhi sesandiso

pha – isakhi sesandiso

Esokukhomba buqamama

sakhelwa kwesokukhomba eduze ngokususa unkamisa wokucina indawo yakhe ithathwe yisijobelelo sokukhomba buqamama u –o.

ngaph(a) + o – ngapho

ngapha – isandiso sokukhomba eduze

o – isijobelelo sokukhomba buqamama

Esokukhomba kude

Sakhiwa ngesakhi sesandiso u nga- lesakhi sokukhomba kude u –le-.

Nga + le – ngale

nga – isakhi sesandiso

le – isakhi sokukhomba kude

Isandiso sendawo

Izandiso zendawo ngamabala akhomba indawo okwenzakalela khona izehlakalo. Zakhelwa emabizweni lakuzabizwana.

Emabizweni

- 1) Kungaqalwa ngesakhi sesandiso u – e- emabizweni alahla unkamisa wakuqala.

e + (i)khaya – ekhaya

e – isakhi sesandiso

ikhaya – ibizo elilahla unkamisa wakuqala

- 2) Kungaqalwa ngesakhi sesandiso u – e- emabizweni alahla unkamisa wakuqala lowokucina kujobelelwe isijobelelo sesandiso u –eni, kumbe in – ini.

e + (i)sandl(a) + eni – esandleni

e + (i)sitof(u) + ini – esitofini

e – isakhi sesandiso

isitofu – ibizo elilahla unkamisa wakuqala lowokucina

ini- isijobelelo sasandiso.

Kungalwangiswa kubondebembili bamalunga okucina kwamanye amabizo kungwaqaziswe u –o lo –u bokucina kwamanye amabizo njalo.

Emgwaqweni, ebhalwini, emlonyeni, emathunjini

Emlonyeni - e + (u)mlom(o) + eni

m>ny

emgwaqweni – e + (u)mgwaqo + eni

o>w

emathunjini – e – (a)mathumb(u) + ini

mb>nj

e – isakhi sesandiso

amathumbu – ibizo elilahla unkamisa wakuqala lowokucina lilwangise u –mb- abe ngu –nj-

ini – isijobelelo sesandiso

ebhalwini – e + (u)bhalu + ini

u>w

e – isakhi sesandiso

ubhalu – ibizo elilahla unkamisa wakuqala lingwaqazise u – u abe ngu – w

ini – isijobelelo sesandsio

- 3) Singaqala ngesakhi sesandiso u –ku- emabizweni alahla unkamisa wakuqala.

Kugogo, kudadewabo, kuyise, kumama

kuSihle – ku + (u)Sihle

ku – isakhi sesandiso

uSihle – ibizo elilahla unkamisa wakuqala

- 4) Kungaqalwa ngesakhi sesandiso u – ko- emabizweni alahla unkamisa wakuqala kukhonjwa imizi.

koDube, koSibanda, koBulawayo, koNdlovu

koNyathi – ko + (u)Nyathi

ko – isakhi sesandiso

uNyathi – ibizo elilahla unkamisa wakuqala.

- 5) Kungaqalwa ngesakhi sesandiso u – pha – emabizweni. Kwamanye amabizo u –a wesakhi u- pha uzalumbana lonkamisa wakuqala webizo kuthi amanye amabizo alahle unkamisa wakuqala.

Phezulu, phetsheya, phambili, phansi, phakathi, phandle

Phezulu – pha + izulu

a+i>e

pha – isakhi sesandiso

izulu – ibizo

e – unkamisa odalwe yikulumbana kuka a – lo –i-.

phandle – pha + (i)ndle

pha – isakhi sesandiso

indle – ibizo elilahla unkamisa wakuqala

kuzabizwana

kuqalwa ngesakhi sesandiso u – **ku** - esabizwaneni.

Ku + leziya – kuleziya

Ku – isakhi sesandiso

Leziya - isabizwana sokukhomba kude

Isabizwana soqobo sizalahla isiqu u – **na** nxa kusakhiwa kuso isandiso sendawo.

Ku + yo(na) – kuyo

Ku – isakhi sesandiso

Yona – isabizwana soqobo esilahla isiqu u – na

Kwezinye izabizwana zoqobo kusetshenziswa isakhi sesandiso u – ki-.

Kithi, kini, kimi

Kithi – ki + thi(na)

Ki – isakhi sesandiso

Thi(na) - isabizwana sobo esilahla isiqu u - na

Isabizwana senani sizalandela isandiso sendawo esakhelwe kusabizwana soqobo. Kuyabe **sekungumtshwana wesandiso**.

Kubo bobabili, kithi sonke, kimi ngedwa, kuyo yomine

Kimi ngedwa – ki + mi(na) ngedwa

Ki – isakhi sesandiso

Mina ngedwa – umtshwana wesabizwana soqobo esihla isiqu u – na

Kusabizwana sokuchasisa

Nxa isabizwana sokuchasisa siqala ngo a- kumbe u e-, u –u- wesakhu u –ku – uyangwaqaziswa abe ngu –w-. Nxa isabizwana sokuchasisa siqala ngo O-, u –ku- uzalahla unkamisa wakhe.

Bahlala **kuliphi** idolobho?

Zihleli **kwamakhulu** amasofa.

Ifele **kwelibanzi** ibholoho.

Uzalala **kowakhe** umuzi namuhla.

Kuliphi – ku + liphi

Ku – isakhi sesandiso

Liphi - isabizwana sokuchasisa

Kwabakhulu – ku + abakhulu

u>w

ku – isakhi sesandiso esingwaqazisa u –u- abe ngu –w-

abakhulu – isabizwana sokuchasisa

kwelibanzi – ku + elibanzi

u>w

ku – isakhi sendiso esingwaqazisa u – u- abe ngu –w-

elibanzi – isabizwana sokuchasisa

kowakhe – k(u) + owakhe

ku – isakhi sesandiso esilahla unkamisa waso

owakhe - isabizwana sokuchasisa

Isandiso sesikhathi

Izandiso zesikhathi ngamabala akhomba isikhathi okwenzakala ngaso izehlakalo.

Emini, ekuseni, kusisa, ngoMgqibelo, kudala, kuthange, khathesi, izolo

- 1) Kungaqalwa ngesakhi sesandiso u – **e-** emabizweni alahla inkamisa wakuqala.
Emini, endulo, emathathakusa, empondozankomo

Emini – e + (i)mini

e- isakhi sesandiso

imini – ibizo elilahla unkamisa wakuqala

- 2) Kungaqalwa ngesakhi sesandiso u –**e-** emabizweni alahla unkamisa wakuqala lowokucina kujobelelwe isijobelelo sesandiso u – **eni**.
Ekuseni, ekuqaleni, ekucineni

Ekuseni – e + (u)kus(a) + eni

E – isakhi sesandiso

Ukusa - ibizo elilahla unkamisa wakuqala lowo kucina

Eni – isijobelelo sesandiso

- 3) Kungaqalwa ngesakhisesandiso u – **ku-** eziqweni zezenzo kugaxekiswe u –**si-** kumbe u-**sa-** phakathi kwesakhi sesandiso lesiqu sesenzo.
Kusisa, kusihlwa, kusitsha, kusasa

Kusihlwa – ku + si + hlwa

Ku – isakhi sesandiso

Si – isigaxekiso

Hlwa - isiqu sesenzo

Isaki u – **ku-** singasebenza lesiqu sesiphawulo u – dala

Ku + dala – kudala

Ku – isakhi sesandiso

dala – isiqu sesiphawulo

u – **ku-** angasebenza njalo lesiqu semvelo

ku + thange – kuthange

ku – isakhi sesandiso

thange - isiqu sesandiso

- 4) Kungaqalwa ngesakhi sesandiso u – nga – emabizweni. U –a- wesakhi sesandiso ulimbana lonkamisa wakuqala webizo.
ngoMgqibelo, ngoNhlangula, ngoLwesine, ngeNsonto, ngo1987

ngoMgqibelo – nga + uMgqibelo

a+u>o

nga – isakhi sesandiso

uMgqibelo – ibizo

o – unkamisa ovele ngokulumbana kuka –a- lo u-

- 5) Esinye isandiso sesikhathi sithatha isimo sebizo.

Izolo – I + zolo

I – isiqalo sesandiso

Zolo – isiqu sesandiso

- 6) Ezinye zakhiwa ngamalunga

Khathesi – kha + the + si

Kha - ilunga lakuqala

the – ilinga lesibili

si – ilunga lesithathu

- 7) Esinye singathathelwa ebizweni elilahla unkamisa wakuqala.

Ntambama - (i)ntambama

Intambama – libizo elilahla unkamisa wakuqala

Isandiso sesimo

Sizakhi zaso ezimqoka:

1) La-

Ukhomba okwenziwa lakho. Uhamba lamabizo lezabizwana. Nxa ehamba lamabizo kulumbana unkamisa ka –la- lowokuqala webizo. Nxa ehamba lesabizwana soqobo uzenza ukuthi silahle isiqu u –na. Nxa ehamba lesabizwana sokuchasisa esiqala ngonkamisa, uzalahla unkamisa wakhe.

Uhamba **lenkazana** encane.

Muphe **lalokho** ukudla okusembizeni.

Khuluma **laye** uzwe ukuthi uthini.

Ubuye **laliphi** ijaha?
Bafike **lelimhlophe** iqhude.

Lenkazana – la + inkazana

a+i>e

la – isakhi sesandiso
inkazana – ibizo
e – unkamisa ovele ngokulumbana kuka –a lo i-

lalokho – la + lokho

la – isakhi sesandiso
lokho – isabizwana sokukhomba buqamama

laye – la + ya(na)

la – isakhi sesandiso
yena – isabizwana soqobo esilahla isiqu u –na

laliphi – la + liphi

la – isakhi sesandiso
liphi – isabizwana sokuchasisa

lelimhlophe – l(a) + elimhlophe

la - isakhi sesandiso
elimhlophe - isabizwana sokuchasisa

2) Nga-

Ukhomba okwenziwa ngakho. Uhamba lamabizo lezabizwana. Nxa ehamba lamabizo kulumbana unkamisa ka –nga- lowokuqala webizo. Nxa ehamba lesabizwana soqobo uzenza ukuthi silahle isiqu u –na. Nxa ehamba lesabizwana sokuchasisa esiqala ngonkamisa, uzalahla unkamisa wakhe.

Umtshaye **ngensimbi** eqinileyo.
Ngamtshelile **ngakho** wazithulela.
Kade zihamba **ngaleli** ibhayisikili.
Ukhuluma **ngasiphi** isithutha?
Upheka **ngoluncane** uphini.

3) Kula –

Uyaqathanisa. Uhamba lamabizo lezabizwana. Nxa ehamba lamabizo kulumbana unkamisa ka –kula- lowokuqala webizo. Nxa ehamba lesabizwana soqobo uzenza ukuthi silahle isiqu u –na. Nxa ehamba lesabizwana sokuchasisa esiqala ngonkamisa, uzalahla unkamisa wakhe.

Iqhude likhulu **kulesikhukhukazi**.
Esikubonileyo kungcono **kulalokhu**.
Yena mubi **kulami**.

Uthi ukudla lokho kungcono **kulakuphi?**

Ikhanda lakhe likhulu **kulelikaThabani.**

4) Njenga –

Uyafananisa. Uhamba lamabizo lezabizwana. Nxa ehamba lamabizo kulumbana unkamisa ka –njenga- lowokuqala webizo. Nxa ehamba lesabizwana soqobo uzenza ukuthi silahle isiqu u –na. Nxa ehamba lesabizwana sokuchasisa esiqala ngonkamisa, uzalahla unkamisa wakhe.

Ugijima **njengebhalabhala** elikhuthwe luhlamvu.

Ufuna ukuba **njengathi** yini?

Yenza **njengalaba** abachumileyo

Ufuna sibe **njengasiphi** isigqoko kulezi?

Namhlanje bahlabele njengabamhlophe enkonzweni.

5) Nganga –

Uyalinganisa. Uhamba lamabizo lezabizwana. Nxa ehamba lamabizo kulumbana unkamisa ka –nganga- lowokuqala webizo. Nxa ehamba lesabizwana soqobo uzenza ukuthi silahle isiqu u –na. Nxa ehamba lesabizwana sokuchasisa esiqala ngonkamisa, uzalahla unkamisa wakhe.

Amehlo akhe athi enjengawenkomo aphinde abe **ngangenqindi** yosane.

6) Sa –

Uyafananisa. Uhamba lamabizo alahla unkamisa wakuqala.

Ukhuluma **samuntu** okhanywe ligwili.

7) Ma-

Mandulo, maqondana.

8) Ka –

Uhamba leziqu zesibaluli lezesiphawulo

Kancane, kakhulu, kabanzi, kamhlophe, kahle, kabi, kamnandi, katsha

Kamnandi – ka + mnandi

Ka – isakhi sesandiso

Mnandi – isiqu sesibaluli

Zikhona ezinye izandiso zesimo ezingasebenzisa isakhi sesandiso u – **ku-** endaweni ka –**ka-**

Ukhulume **kuhle** ngempumela yethu / ukhulume **kahle** ngempumela yethu.

Woza siqalisele **kutsha** / woza siqalisele **katsha**.

Ungitshaye **kubi** ngensimbi / ungitshaye **kabi** ngensimbi.

ISENZO

Ligama elikhomba **ukwenza** okuphathelelane losobizo kumbe **isimo** usobizo akuso. Lenza umsebenzi wokulandisa.

Ukwakhiwa kwesenzo

Sakhiwa ngezivumelwano lesiqu sesenzo. Kungabakhona njalo izinsizasenzo ezincedisa isenzo ukuthi siphe imiqondo etshiyeneyo ephathelane lesikhathi, iziqondiso lezindlela zezenzo.

Isivumelwano senhloko

Yingxenye yakuqala yesenzo eletha ukuvumelana kumbe ukuhambelana phakathi kwenhloko (umenzi) lesenzo.

Umfundisi **ubala** umbhalo.

Isiyelele **sibalekile** esikolo.

Isivumelwano senhloko sivela kuziqalo samabizo ezilahla onkamisa bakuqala labomankankana nxa bekhona.

(um)u – u

(i)si –si

(a)ba – ba

(i)li – li

(i)zi(N) – zi

(im)i – i

lu – (u)lu

ulu – isiqalo sebizo esilahla unkamisa wakuqala

Isivumelwano senhloko siyaguquka ngesikhathi, ngezindlela langeziqondiso zezenzo. Siyavuma njalo ukuthi kungene ezinye izakhi phakathi kwaso lesiqu sesenzo.

Umfundisi **ubala** umbhalo.

Umfundisi **wabala** umbhalo.

Umfundisi **u/za/bala** umbhalo.

Uma umfundisi **ebala** umbhalo mlaleleni.

Umfundisi **angabala** umbhalo.

Isivumelwano sikamenziwa

Yingxenye yesenzo eletha ukuvumelana phakathi kwesenzo lomenziwa. Asiguquki ngesikhathi, ngezindlela langeziqondiso zezenzo. Kasivumi njalo ukuthi kungene ezinye izakhi phakathi kwaso lesiqu sesenzo. Sivela kuziqalo zamabizo ezilahla onkamisa bakuqala labomankankana njengesivumelwano senhloko. Umehluko ukusigaba **1, 3, 4, 6 lo 9**. Kusigaba **1** isivumelwano sikamenziwa ngu **-m-**. Kusigaba **3, 4, 6 lo 9** isivumelwano senhloko singunkamisa, kungaphongoziswa usingankamisa ofaneleleyo kuso kuphuma esikamenziwa.

Isivumelwano senhloko

(um)u – u

Umfundi **u**hlupha izingwalo

(um)u – u

Umuthi **u**gcwele embodloleni

(im)i – i

Imizi ilandela umgwaqo

(am)a – a

Amakhiwa **a**thanda izinyamazana

(iN)I – i

Inja ilume umfana

Isivumelwano sikamenziwa

(u)m(u) - **m**

izingwalo ziy**a**hlupha umfundi

w+u – **wu**

umntwana **u**wunathile umuthi

y+i – **yi**

abahlamuki bay**i**tshisile imizi

w+a – **wa**

izinyamazana ziy**a**wathanda amakhiwa

y+i – **yi**

umfana **u**yilumileinja

Kwezinye izigaba akula mehluko phakathi kwesivumelwano senhloko lesikamenziwa.

Kokhulumayo isivumelwano senhloko lesikamenziwa ngi **-ngi-**

Mina **ngi**thanda ukuthula

umphathi wang**i**thulisa ngoswazi

Isakhi sokuzenza

Ngu **-zi-** okhomba ukuzenza. Ukhomba ukuthi lowo ongumenzi ungumenziwa futhi.

Intombi kaMandla iyaz**i**thanda.

Umntwana uz**i**lume umunwe.

Iziqu zezenzo.

-hamba, -gijima, -dla, -ma, -osa, -eba, etc

Zakhiwa ngomsuka wesenzo lonkamisa wokucina wesenzo u **-a**.

Umsuka wesenzo yingxenywe yesenzo engaguqukiyo nxa isenzo siguquguquka sithatha izimo ezitshiyeneyo.

Hamba – hamba + a

Hamb – umsuka wesenzo

a – unkamisa wokucina wesenzo

iziqu zezenzo ezingacini ngonkamisa –a.

-azi, -thi, -tsho.

Izalukazi **zazi** ukuhlabela esontweni.

Isanyongwana **sithi** sesidiniwe.

Bona **batsho** ukuthi sebehamba

Sithi – si + th + i

Si – isivumelwano senhloko

th – umsuka wesenzo

i – unkamisa wokucina wesenzo

batsho – ba + tsh + o

ba – isivumelwano senhloko

tsh – umsuka wesenzo

o – unkamisa wokucina wesenzo

Iziqu zezenzo eziqala ngonkamisa zihamba lezivumelwano zenhloko.

- 1) Nxa kulesengezo emutshweni, isivumelwano senhloko silahla unkamisa waso. Nxa isivumelwano senhloko singunkamisa siyangwaqaziswa u **-i-** abe **-y-** u **-u-** abe ngu **-w-**. Kuzigaba 11 lo 15, izivumelwano zenhloko ziyabangwaqazisa onkamisa babe ngu **-w-** nxa isiqu sesenzo siqala ngo a- kumbe **-e**.
Izalukazi **zazi** ukuhlabela esontweni.
Umntwana **wetha** inganekwane.
Inja **yotha** umlilo.
Uhlanya **lweba** ukudla
Ukudla **kwakha** umzimba

Zazi – z(l) + az + i

Z(l) – isivumelwano senhloko esilahla unkamisa waso

az- umsuka wesenzo

i- Unkamisa wokucina wesenzo

Wetha – u + eth + a

u>w

u – isivumelwano senhloko esingwaqaziswa sibe ngu **-w**

eth – umsuka wesenzo

a- Unkamisa wokucina wesenzo

Yotha - l + oth + a

i>y

l – isivumelwano senhloko esingwaqaziswa sibe ngu **-y**.

Oth – umsuka wesenzo

a- Unkamisa wokucina wesenzo

Lweba – lu + eb + a

u>w

lu – isivumelwano senhloko esingwaqaziswa u **-u-** abe ngu **-w**

eb – umsuka wesenzo

a- Unkamisa wokucina wesenzo

Kwakha – ku + akh + a

u>w

ku – isivumelwano senhloko esingwaqazisa u –u- abe ngu –w-

akh – umsuka wesenzo

a – unkamisa wokucina wesenzo

- 2) Nxa kungelasengezo emutshweni kugaxekiswa insizasenzo yesikhathi sakhathesi u –ya- kodwa alahle unkamisa wakhe.

Umntwana **uyosa**.

Abakhwenyana **bayesaba**

Uyosa – u + y(a) + os + a

U – isivumelwano senhloko

Ya – insizasenzo yesikhathi sakhathesi elahla unkamisa wayo

os – umsuka wesenzo

a- Unkamisa wokucina wesenzo

Iziqu zezenzo eziqala ngonkamisa –i- ocatshileyo

Ukuthi kulo –i- ocatshileyo kubonakala nxa lezi iziqu zilandela isakhi esilo –a-. Kudaleka u –e- okuyikho okuveza lowo –i- obecatshile.

Zine: **-zwa, -ma, -za, -mba**

Ngezwa bethi usetshiyile.

Siyema lapha, sizaqhubeka kusasa.

Bayeza ngoMpalakazi abafowethu.

Wemba ngomkhonto, wemba ngenduku.

Bayeza - ba + ya + iz + a

a+i>e

ba – isivumelwano senhloko

ya – insizasenzo yesikhathi sakhathesi

iz – umsuka wesenzo

a -Unkamisa wokucina wesenzo

e – unkamisa ovele ngokulumbana kuka a- lo i

Isenzo esilandulayo

Sisebenzisa izakhi zokulandula ezilandelayo:

Ka- , a-, -ka-, -nga-, -nge-, -nga, -e, -i

U –nga, -e, lo –i bathiwa yizijobelelo zokulandula ngoba bengena ekucineni kwesenzo.

Kabakhulumanga, asikavumi, zazingakabuyi, lungebalume

Kabakhulumanga – ka + ba + khulum + a + nga

Ka – isakhi sokulandula

ba – isivumelwano senhloko

khulum – umsuka wesenzo

a - Unkamisa wokucina wesenzo

nga – isijobelelo sokulandula

Isenzo esibuzayo

Sisebenzisa isijobelelo sokubuza u –ni?

Kanti lezo **zidingani**?

zidingani – zi + ding + a + ni

zi - isivumelwano senhloko

ding – umsuka wesenzo

a – unkamisa wokucina wesenzo

ni – isijobelelo sokubuza

Isingasenzo

Leli ligama elifana lesenzo ngenxa yokuthi liyasebenzisa izakhi ezisetshenziswa yizenzo kodwa kalizimeli lodwa ukuze liphe umqondo opheleleyo. Ukuze umqondo walo upheleliswe kumele lilandelwe yisenzo. Kulezingasenzo ezisebenzisa isiqu semvelo lezisebenzisa iziqu zezenzo.

Ezileziqu zemvelo

Bona **bamane** bakholise lanxa kungelangqondo.

Izingane **zisuke** zimangale ukuthi uyise ungenwe yini.

Zisuke – zi + suke

Zi – isivumelwano senhloko

suke – isiqu sesingasenzo

Ezileziqu zezenzo

Uyise **utshona** ekhuluma yedwa.

Abafana **bahamba** betshaya amankazana.

Utshona – u + tshon + a

U – isivumelwano senhloko

tshon – umsuka wesenzo

a - Unkamisa wokucina wesenzo

Isenzoso

Yisenzo esikhomba **isiko** usobizo akuso.

Silezijobelelo u **-e** lo **-ile**. Ezinye zijobelela u **-i**.

Inja le **ifile**.

Abadlali **bamangele** ukuthi ungaphi umkhokheli

Ixhegu leli **lisuthi**.

Ifile – I + f + ile

I – isivumelwano senhloko

f – umsuka wesenzo

ile – isijobelelo sesenzoso.

Bamangele – ba + mangel + e

Ba – isivumelwano senhloko

mangel – umsuka wesenzo

e – isijobelelo sesenzosimo

lisuthi – li + suth + i

li – isivumelwano senhloko

suth – umsuka wesenzo

I – isijobelelo sesenzosimo

Isenzo esisabizo

Sibonakala ngesiqala samabizo kasigaba 15, **uku-, uk-, lo ukw-**

Umnawabo ubotshelwe **ukutshontsha** impahla zabemzini.

Bathabele **ukosa** inyama yendlovu.

Ufuna **ukwenda** kodwa usesemncane.

Ukutshontsha - uku + tshontsh + a

Uku – isiqalo sebizo

tshontsh – umsuka wesenzo

a – unkamisa wokucina wesenzo

Isenzo esiphoqayo

Ukuphoqa yikubamba ngamandla. Lesisenzo kasisebenzisi isivumelwano senhloko.

- 1) Eziqwini zezenzo ezingolungalinye kusetshenziswa isakhi sokuphoqa – **na**, ebunyeni lo –**nini** ebunengini.

Dlana,

phana,

dlanini

phanini

Dlana – dl + a + na

dl – umsuka wesenzo

a – unkamisa wokucina wesenzo

na – isijobelelo sokuphoqa

phanini – ph + a + nini

ph – umsuka wesenzo

a – unkamisa wokucina wesenzo

nini – isijobelelo sokuphoqa

- 2) Eziqwini zezenzo ezilamalunga angaphezu kwelilodwa akuguquki lutho ebunyeni kodwa ebunengini kujobelelwa isijobelelo sokuphoqa u **–ni**

Khuluma, hamba khilikithelani phakamani

Khuluma – khulum + a

Khulum – umsuka wesenzo

a – unkamisa wokucina wesenzo

Phakamani – phakam + a + ni

Phakam – umsuka wesenzo

a -Unkamisa wokucins wesenzo

- 3) Singaqala ngesivumelwano sika menziwa kujobelelwe isijobelelo sokuphoqa u **–e** ebunyeni kumbe u **–eni** ebunengini.

Litshaye uma lingazwisisi.

Babambeni bengalimazi umntwana

Litshaye – li + tshay + e

Li – isivumelwano sikamenziwa

tshay – umsuka wesenzo

e – isijobelelo sokuphoqa

babambeni – ba + bamb + eni

ba – isivumelwano sikamenziwa

bamb – umsuka wesenzo

eni – isijobelelo sokuphoqa

Isenzo esikusikhathi esadlulayo

Sisebenzisa isivumelwano senhloko esilesakhi sesikhathi esadlulayo u **–a**. Nxa kusakhiwa isivumelwano senhloko sesikhathi esadlulayo, isakhi sesikhathi esadlulayo u **–a** sithatha indawo kankamisa wesivumelwano senhloko. Onkamisa bezivumelwano zenhloko zesigaba **11 lo 15 (lu lo Ku)** kabalahlawa kodwa bayangwaqaziswa babe ngu **–w-**. Nxa isivumelwano senhloko singunkamisa i- kumbe **u-** bayangwaqaziswa babe ngu **y-** kumbe **w-** ngokufaneleyo.

U+a>wa

l(i)+a> la

s(i)+a>sa

b(u)+a>ba

z(i)+a>za

lu+a>lwa

ku+a>kwa

i+a>ya

u>w

u>w

i>y

wa – u + a

u – isivumelwano senhloko esingwaqaziswa sibe ngu w

a – isakhi sesikhathi esadlulayo

ba – b(u) + a

bu – isivumelwano senhloko esilahla unkamisa waso

a – isakhi sesikhathi esadlulayo

Izinja **zazikhonkotha** umntwana.

uNkulunkulu **wavela** kunceku zakhe.

Zakhonkotha – za + zi + khonkoth + a

Za – isivumelwano senhloko sesikhathi esadlulayo

Zi – isivumelwano senhloko

Khonkoth – umsuka wesenzo

A -Unkamisa wokucina wesenzo

Isenzo esikusikhathi esedlulileyo

Sisebenzisa insizasenzo yesikhathi esedlulileyo u **–be-** lezijobelelo zesikhathi esedlulileyi u **–e lo –ile.**

Ikhanka **belikhala** kakhula kakhulu.

Indoda **idle** umumbu omnengi

Uganga lwakhe **luhambile.**

Belikhala – be + li + khal + a

Be – insizasenzo yesikhathi esedlulileyo

li – isivumelwano senhloko

khal – umsuka wesenzo

a – unkamisa wokucina wesenzo

idle – I +dl + e

I – isivumelwano senhloko

dl – umsuka wesenzo

e – isijobelelo sesikhathi esedlulileyo

luhambile – lu + hamb + ile

lu – isivumelwano senhloko

hamb – umsuka wesenzo

ile – isijobelelo sesikhathi esedlulileyo

Isenzo esikusikhathi sakhathesi

Silensizasenzo yesikhathi sakhathesi – ya-

Thina **siyajabula**

Amankazana **ayageza**

Ayageza – a + ya + gez + a

a – isivumelwano senhloko

ya – insizasenzo yesikhathi sakhathesi

gez – umsuka wesenzo

a – unkamisa wokucina wesenzo

Isenzo singakhomba isikhathi sakhathesi lanxa singelayo insizasenzo u – **ya-**

Abantwana **badlala** ibhola.

Isenzo eskusikhathi esizayo

Silezinsizasenzo u –**za -**, **-zo-**, **-ya-**, **-yo-**

Ilanga **lizambhaxabula** angadlala phandle

Unina **uzobagcina** kuze kube kusasa

Ngiyahamba nxa umama engafika

Bayofika kwangqi ngetshe.

Lizambhaxabula – li + za + m + bhaxabul + a

li – isivumelwano senhloko

za – insizasenzo yesikhathi esizayo

m – isivumelwano sikamenziwa

bhaxabul – umsuka wesenzo

a - Unkamisa wokucina wesenzo

Isenzo esikusiqondiso esesenzeka

Yisenzo esikhomba ukuthi ulutho okukhulunywa ngalo belungakenzeki kodwa seluqala ukwenzeka.

Silensizasenzo u –**se-** olandulwa ngo – **ka –**

Isilwane **sesikhanuka** inyama.

Isilwane **kasikakhanuki** inyama

Ilanga **selitshona**

Ilanga **alikatshoni**

Sesikhanuka – se + si + khanuk + a

se – insizasenzo yesiqondiso esesenzeka

si – isivumelwano senhloko

khanuk – umsuka wesenzo

a - Unkamisa wokucina wesenzo

Isenzo esikusiqondiso esisaqhubeka

Yisenzo esikhomba ukuthi okukhulunywa ngakho kulesikhathi kesenzeka njalo kusaqhubeka, akukami. Silensizasenzo u –sa-.

Izintombi **zisabazonda** abalodlakela.

Bona **basavuka** bethandaza nsukuzonke.

Zisabazonda – zi + sa + ba + zond + a

Zi – isivumelwano senhloko

sa - insizasenzo yesiqondiso esisaqhubeka

ba – isivumelwano sikamenziwa

zond – umsuka wesenzo

a – unkamisa wokucina wesenzo

Isenzo esikusiqondiso nje

Sikhomba nje ukuthi ulutho luyenzeka. Kasilayo insizasenzo eqondane laso. Ukungabikhona kwensizasenzo - -se- eyesiqondiso esesenzeka kumbe u – sa- eyesiqondiso esisaqhubeka kuveza ukuthi isenzo siyisiqondiso nje.

Abantwana **badlala** ibhola.

Isithutha **siginye** amaganu.

Siginye – si + giny + e

Si – isivumelwano senhloko

giny – umsuka wesenzo

e – isijobelelo sesikhathi esedlulileyo.

Isenzo esikundlela yamandla

Yisenzo esikhomba ukuba lamandla kumbe ukwanelisa ukwenza okuthise. Silomqondo wokuthi kungenzeka. Silensizasenzo u – **nga** – elandulwa ngo – **nge** -.

Ubunyonyo **bungayibulala** indlovu.

Ubunyonyo **bungeyibulale** indlovu.

Bungayibulala – bu + nga + yi + bulal + a

bu – isivumelwano senhloko

nga – insizasenzo yendlela yamandla

yi – isivumelwano sikamenziwa

bulal – umsuka wesenzo

a – unkamisa wokucina wesenzo

bungeyibulale – bu + nge + yi + bulal + e

bu – isivumelwano senhloko

nge – isakhi sokulandula

yi – isivumelwano sikamenziwa

bulala – umsuka wesenzo

e – isijobelelo sokulandula

Isenzo esikundlela yamandla yesimo

Yindlela yamandla esebenza ilandela izihlanganiso: **uma**, **nxa** kumbe **lapho**.

Nxa **zingaphuma** khathesi, zizabuya lemali enengi.

Uma **lingabalandela** lizabathola eduze.

Lapho **ungafika** endlini ugezise abantwana.

Zingaphuma - zi + nga + phum + a

zi – isivumelwano senhloko

nga – insizasenzo yendlela yamandla

phum – umsuka wesenzo

Isenzo esikundlela eqondisayo

Siveza nje ukuthi ulutho luyenzeka. Kasilansizasenzo eqondane laso.

Inkukhu **inatha** amaqanda ayo

Umalume **uhlala** ePlumtree.

Inatha – i + nath + a

i – isivumelwano senhloko

nath – umsuka wesenzo

a – unkamisa wokucina wesenzo

Isenzo esikundlela eqondisayo yesimo

Siyafana lendlela eqondisayo kodwa zehlukana ngephimbo langezivumelwano zenhloko kusiga 1, 1a, 2, 2a lo 6. Zehlukana njalo ngokuthi indlela eqondisayo yesimo isebenza ilandela izihlanganiso **uma**, **nx**a kumbe **lapho**.

Umfana **uphuma** umungula. – (eqondisayo)

Uma umfana **ephuma** umungula muse esibhedlela. – (eqondisayo yesimo)

Ababalisi **bafundisa** abangakwaziyo. – (eqondisayo)

Lapho ababalisi **befundisa** abangakwaziyo kabancediswe. – (eqondisayo yesimo)

Amadoda **ahlafuna** udaba lobusela. – (eqondisayo)

Nxa **ehlafuna** udaba lobusela kazise amapholisa – (eqondisayo yesimo)

Isenzo esikundlela eyamile

Ubunengi bezenzo ezikundlela eyamile zilesijobelelo sendlela eyamile u –e. Kulezimo ezimbalwa ezenza ukuthi kuthiwe isenzo siyindlela eyamile.

- 1) Isenzo singalandela **isingasenzo** siyindlela eyamile.
Ngisuke **ngiswele** ukuthi ufuna ngenzeni.
- 2) Isenzo singalandela izihlanganiso **ukuze, ukuthi** kumbe **ukuba** siyindlela eyamile.
Batshaye ukuze **bakuhloniphe**.
Sifuna ukuthi **uthanyele** endlini
Zitshale ukuba **zizithibe** izinsizwa lezo.
- 3) Isenzo singalandela esinye isenzo siyindlela eyamile.
Uyise uhamba **ehlabela**.
- 4) Isenzo zingalandelana zikhomba ukulandelana kwezehlakalo ziyindlela eyamile.
Unina uvuka **athanyele, ageze, apheke,adle, aye** emsebenzini. (elinye lelinye elicindezeliweyo liyindlela eyamile.)
- 5) Isenzo esibuza sidinga iseluleko siyindlela eyamile. (ngesidinga impendulo ethi ye kumbe hatshi)
Malume, uthe **sihambe?**
- 6) Isenzo esikundlela eyamile singakhomba impoqo. Sisebenzisa izakhi ka-, a- kumbe –bo-.
Kasibaleke sizaze sibanjwe.
Asihambe sonke, ngiyesaba uma ngingedwa
Libokhuluma iqiniso lina bantwana.

Ngiswele – ngi + swel + e

Ngi – isivumelwano senhloko

swel – umsuka wesenzo

e – isijobelelo sendlela eyamile

zizithibe – zi + zi + thib + e

zi – isivumelwano senhloko

zi – isakhi sokuzenza

thib – umsuka wesenzo

e –isijobelelo sendlela eyamile

kasibaleke – ka + si + balek + e

ka – isakhi sendlela eyamile

si – isivumelwano senhloko

balek – umsuka wesenzo

e – isijobelelo sendlela eyamile

asihambe – a + si + hamb + e

a – isakhi sendlela eyamile

hamb – umsuka wesenzo

e – isijobelelo sendlela eyamile

libokhuluma – li + bo + khulum + a

li – isivumelwano senhloko

bo – isakhi sendlela eyamile

khulum – umsuka wesenzo

a – unkamisa wokucina wesenzo

Izenzo ezisempambosini

Lezi ngezeliweyo kusetshenziswa izelulo ezehlukeneyo ukuze ziphe imiqondo etshiyeneyo yesenzo

Impambosi	iselulo	izibonelo
Eyokwenzela	-el-	bamthengela
Eyokwenzisa	-is-	ukhalisa
Eyokwenzisisa	-isis-	watshumayelisisa
Eyokwenziwa	-w-, -iw-	lutshaywe, siyadliwa
Eyokwenzana	-an-	siyahluphana
Eyokwenzayenza	iphinda isiqu	lwadlayidla, zagijigijima
Eyokwenzeka	-ek-, -akal-	uyabukeka, zatholakala

Bamthengela – ba + m + theng + el + a

ba – isivumelwano senhloko

m – isivumelwano sikamenziwa

theng – umsuka wesenzo

el – iselulo sempambosi yokwenzela

a – unkamisa wokucina wesenzo

zagijigijima – za + giji(ma) + gijim + a

za – isivumelwano senhloko sesikhathi esadlulayo

gijima – isiqu sesenzo esilahla ilunga lokucina

gijim – umsuka wesenzo

a – unkamisa wokucina wesenzo

lwadlayidla – lwa + dl + a + yi + dl + a

lwa – isivumelwano senhloko sesikhathi esadlulayo

dl – umsuka wesenzo

a – unkamisa wokucina wesenzo

yi - isigaxekiso

dl – umsuka wesenzo

a – unkamisa wokucina wesenzo.

Zebuyebuyebula – s(a) + ebu(la) + y + ebul + a

sa – isivumelwano senhloko sesikhathi esadlulayo

ebula- isiqu sesenzo esilahla ilunga lokucina

y – isigaxekiso

ebul – umsuka wesenzo

a – unkamisa wokucina wesenzo

Isenzo sisinye singangena empambosini ezingaphezu kweyodwa. Nxa kunjalo siyiqamba ngeselulo sokucina.

Ugogo **wagijimiselwa** esibhedlela ngemva kokulimala kwakhe

Wagijimiselwa – yisenzo esikumpambosi yokwenziwa.

Wagujimiselwa – wa + gijim + is + el + w + a

Wa – isivumelwano senhloko sesikhathi esadlulayo

gijim - umsuka wesenzo

is – iselulo sempambosi yokwenzisa

el – iselulo sempambosi yokwenzela

w – iselulo sempambosi yokwenziwa

a – unkamisa wokucina wesenzo

ISIBANJALO

Ligama elenza umsebenzi wokulandisa njengesenzo. Sakhelwa emebizweni, kuzabizwana, kuzichasiso, lezandisweni basekusibakhona isibanjalo sokukhomba.

Isakhiwa ngasakhi – NG-

- 1) Uhamba lamabizo aqala ngo a-, o-, lo u-
Ngabantu, ngobaba, ngudadewethu

Ngudadewethu – ng + udadewethu

Ng – isakhi sesibanjalo

Udadewethu – libizo

- 2) Angahamba lezabizwana zokuchasisa eziqala ngonkamisa.
Elikayise iqhaga ligcwele utshwala.
Ngelikayise iqhaga eligcwele utshwala
Olukhulu uluthi luzwisa ubuhlungu.
Ngolukhulu uluthi oluzwisa ubuhlungu.
Abahlakaniphileyo abafana bazithulele.
Ngabahlakaniphileyo abafana abazithuleleyo

Ngabahlakaniphileyo – ng + abahlakaniphileyo

Ng – isakhi sesibanjalo

Abahlakaniphileyo – isabizwana sokuchasisa

Singakhiwa ngesakhi u –y-

Uhamba lamabizo aqala ngo i-. Ngamabizo kasigaba 4, 7, 8, 9 lo 10.

Yimithi, yisiphala, yizitsha, yimbuzi, yizinto

Y + imbuzi – yimbuzi

Y – isakhi sesibanjalo

Imbuzi – libizo

Singakhiwa ngesakhi u –yi-

- 1) Engahamba lamabizo alahla unkamisa wakuqala. Ngamabizo kasigaba 15 lamanye aku 14
Yikudla, yikufa, yibubi, yibuvila, yibulema

Yibulema - yi + (U)bulema

Yi – isakhi sesibanjalo

Ubulema – libizo elilahla unkamisa wakuqala

- 2) Engahamba lesichasiso senani
Uthanda ibhulugwe **liphi** kulawa?
Ibhulugwe olithandayo kulawa **yiliphi?**

Yiphi – yi + liphi

Yi – isakhi sesibanjalo

liphi - inani

- 3) Engahamba lesabizwana sokuchasisa senani;
Uthanda **liphi** ibhulugwe kulawa?
Yiliphi ibhulugwe olithandayo kulawa?

Yiliphi – yi + liphi

Yi – yisakhi sesibanjalo

Liphi – yisabizwana sokuchasisa

- 4) Engahamba lesabizwana soqobo esilahla esiqu u –na lesabizwana sokukhomba.
Yikho, yizo, yiloluya, yilabo, yiyo

Yikho – yi + kho(na)

Yi – isakhi sesibanjalo

Khona – isabizwana soqobo esilahla isiqu u – na

Yilabo – yi + labo

Yi – isakhi sesibanjalo

labo – isabizwana sokukhomba buqamama

Singakhiwa ngesakhi u – ngu-

- 1) Uhamba lesabizwana soqobo esilahla isiqu u –na

Nguwe, nguye

Nguye – ngu + ye(na)

Ngu – isakhi sesibanjalo

yena – isabizwana soqobo esilahla isiqu u –na

- 2) Angahamba lesichasiso senani sikasigaba 1 losigaba 3.

Umntu okhuluma ngaye **nguwuphi?**

Uthe umuzi wakhona **nguwuphi?**

Nguwuphi – ngu + wuphi

Ngu- isakhi sesibanjalo

wuphi – inani

- 3) Angahamba lesabizwana sokuchasisa senani

Nguwuphi umntu okhuluma ngaye?

Uthe **nguwuphi** umuzi wakhona?

Nguwuphi – ngu + wuphi

Ngu – isakhi sesibanjalo

wuphi – isabizwana sokuchasisa

Singakhiwa ngesakhi – ku-

Uhamba lezandiso. Nxa isandiso siqala ngonkamisa kugaxekiswa u –s- phakathi kwesakhi sesibanjalo u –ku- lesandiso

Lapha **kuphansi** akusikho phezulu.

Ngakibo **kuselokitshini** elidala.

Kuphansi – ku + phansi

Ku – isakhi sesibanjalo

phansi – isandiso sendawo

kuselokitshini – ku + s + elokitshini

ku – isakhi sesibanjalo

s- isigaxekiso

elokitshini – isandiso sendawo

Singakhiwa ngesivumelwano senhloko

- 1) Kungaqalwa ngesivumelwano senhloko emabizweni kasigaba 5, 11 lamanye akusigaba 14. Ibizo lizalahla unkamisa walo wakuqala.

Lilanga, lilihlo, lulude, lulusu, buboya, butshwala

Lilanga – li – (i)langa

li – isivumelwano senhloko

ilanga – ibizo elilahla unkamisa wakuqala

lulude – lu + (u)lude

lu – isivumelwano senhloko

ulude – ibizo elilahla unkamisa wakuqala

butshani – bu + (u)tshani

bu – isivumelwano senhloko

utshani – ibizo elilahla unkamisa wakuqala

- 2) Kungaqalwa ngesivumelwano senhloko kusabizwana senani.

Ngingedwa, Sisonke, zizozintathu, babobane, uwedwa, lilonke

Ngingedwa – ngi + ngedwa

Ngi – isivumelwano senhloko

ngedwa – isabizwana senani

zizozintathu – zi + zozintathu

zi – isivumelwano senhloko

zozintathu – isabizwana senani

- 3) Kungaqalwa ngesivumelwano senhloko kusibaluli esilahla isivumelwano saso sonke.

Ku + (oku)mhlophe – **kumhlophe**

Zi + (ezi)luhlaza – **ziluhlaza**

I + (e)manzi – **imanzi**

Kumhlophe – ku + (oku)mhlophe

Ku – isivumelwano senhloko

Okumhlophe - isibaluli esilahla isivumelwano saso.

- 4) Kungaqalwa ngesivumelwano senhloko kuziphawulo zikasigaba 9 ezilahla unkamisa wakuqala.

Encane, enkulu, entsha, ende, emfitshane, endala, enhle, embi

I + (e)nhle – inhle

i – isivumelwano senhloko

enhle – isiphawulo esilahla unkamisa wakuqala.

5) Kungaqalwa ngezivumelwano zenhloko ezandisweni

Nxa isandiso siqala ngonkamisa kugaxekiswa u –s- phakathi kwesivumelwano senhloko lesandiso.

Izingane **ziphandle** khona kulomqando onje!

Abalimi **basemasimini** amatsha.

Isilimela **siphezulu**.

Umdlalo wakhe **usebusuku**.

Ziphandle - zi + phandle

zi – isivumelwano senhloko

phandle – izandiso sendawo

usebusuku – u + s + ebusuku

u – isivumelwano senhloko

s – isigaxekiso

ebusuku – isandiso sesikhathi

Kuzichasiso zesiphawulo isibanjalo sakhiwa ngokususa unkamisa wakuqala.

Umuzi **omkhulu** ngokaSiziba

Umuzi kaSiziba **mkhulu**

Ikhanda **elincane** liyahlekisa

Ikhanda elihlekisayo **lincane**.

Lincane – (e)lincane

Elincane – isiphawulo esilahla unkamisa wakuqala

Mkhulu – (o)mkhulu

Omkhulu – isiphawulo esilahla unkamisa wakuqala

Isibanjalo sokukhomba

Sikhomba eduze, buqamama, lakude

Esokukhomba eduze

Sakhiwa ngesakhi sesibanjalo sokukhomba u – **naN**- lesiqalo sebizo esilahla unkamisa wakuqala. Kubakhona ukuguquka kwabongwaqa bezinye iziqalo zamabizo kusiya ngezigaba.

- | | | | |
|-----|----------------|---|-------|
| 1) | naN + (u)mu | - | nangu |
| | m>g | | |
| 2) | naN + (a)ba | - | nampa |
| | b>p | | |
| 3) | naN + (u)mu | - | nanku |
| | m>k | | |
| 4) | naN + (i)mi | - | nansi |
| | m>s | | |
| 5) | naN + (i)li | - | nanti |
| | l>t | | |
| 6) | naN + (a)ma | - | nanka |
| | m>k | | |
| 7) | naN + (i)si | - | nansi |
| 8) | naN + (i)zi | - | nanzi |
| 9) | naN + (i)Ni | - | nansi |
| | n>s | | |
| 10) | naN + (i)zi(N) | - | nanzi |
| 11) | naN + (u)lu | - | nantu |
| | l>t | | |
| 12) | | - | |
| 13) | | - | |
| 14) | naN + (u)bu | - | nampu |
| | b>p | | |
| 15) | naN + (u)ku | - | nanku |

Isibanjalo sokukhomba buqamama

Sakhelwa phezu kwesokukhomba eduzo ngokususa unkamisa wokucina indawo yakhe ithathwe yisijobelelo sokukhomba buqamama u- o

Nank(a) + o – nanko

Nang(u) + o – nango

Nanso – nans(i) + o

Nansi – isibanjalo sokukhomba eduze esilahla unkamisa wokucina

O – isijobelelo sokukhomba buqamama

Isibanjalo sokukhomba kude

Sakhelwa phezu kwesokukhomba eduze ngokujobelela isijobelelo sokukhomba kude u-ya kumbe u – yana.

Nampa + yana – nampayana

Nanzi + ya – nanziya

Nantiyana – nanti + yana

Nanti – isibanjalo sokukhomba eduze

Yana – isijobelelo sokukhomba kude

IZENZUKUTHI

- 1) Ezingolunga linye.
Zakhiwa ngemisindo yenkulumo.

Kumhlophe **nke**.
Thula **zwi** ungakhulumi laye
Kuthe **ngxi** embelweni wesibaya akunyikinyeki

Nke – n + k + e

n – ungwaqa

k – ungwaqa

e – unkamisa

- 2) Ezilamalunga angaphezu kwelilodwa.
Zikhawiwa ngeziqa kumbe amalunga

Wathi **khilikithi** ewela edongeni

Amakhala ayesebombu **gebhu**

Ngitshe **tshampu** ngayafika esibhedlela

Khilikithi – khi + li + ki + thi

Khi – ilunga lakuqala

li – ilunga lesibili

ki – ilunga lesithathu

thi - ilunga lesine

- 3) Eziziphindayo

Wayithi **dabudabu** incwadi eyayivela emapholiseni

Babuthi **gojegoje** babuqeda utshwala

Gojegoje – goje + goje

Goje – isenzukuthi

goje – isenzukuthi

- 4) Ezakhelwe kwezinye ngokujobelela – u – lala, -lele, -lili, -lolo
Wathalala, khehlelele, khwimilili, phothololo

Phothololo – photho + lolo

Photho – isenzukuthi

lolo – isijobelelo sesenzukuthi

- 5) Ezekhelwe ezenzweni ngokujobelela u –i kumbe u –iyani. Isenzo silahla unkamisa waso wokucina.

Wamuthi **ncwebi** endlebeni wahlaba umkhosi.

Sathi **bhodiyani** samthola esesilindele.

Ncwebi – ncweb(a) + i

ncweba – isenzo esilahla unkamisa wokucina

I – isijobelelo sesenzukuthi

Bhodiyani – bhod(a) + iyani

Bhoda – isenzo esilahla unkamisa wokucina

iyani – isijobelelo sesenzukuthi

IMIKHUBA LAMASIKO AMANDEBELE

Veza injongo yogwalo lolu.

- Ukufundisa ngembali, amasiko lemikhuba yamaNdebele
- Ukuthuthukisa ulimi – luyachasisa amanye amabala
- Ukukhuthaza ukulandelwa kwamasiko
- Ukuvuselelwa kwamasiko
- Ukusola indlela amasiko aselahlwe ngayo
- Ukucacisisa ngenguquko esikhona emasikweni
- Ukuhlomisa abantu ngolwazi lwentuthuko yomdabu
- Ukuvuselela inhlonipho kwabasakhulayo
- Ukubuka izindlela zokuxazulula izingxabano ezazisetshenziswa endulo
- Ukufundisa abasakhulayo ngendlela okumele baziphathe ngayo sebefike ezingeni thile
- Ukufundisa ngokudla kwendulo lezikhathi okwakudliwa ngazo
- Ukuthuthukisa Ubuntu
- Ukuthuthukisa ukwazisana njengezihlobo
- Ukukhuthaza ukuphathisana ezikhathini zobunzima
- Ukufundisa ngamazilo esintwini
- Ukuthuthukisa ukuthula emphakathini
- Ukuthuthukisa ukusetshenziswa kolimi olufaneleyo kumumo etshoyeneyo eg, emfeni
- Ukulimukisa ngezingozi zokungalandeli amasiko
- Ukubuka imfundiso yamaNdebele

Uyintombi esiqale ukukhonjiswa. Xoxa ngokufanele ukutsho kumumo eyehlukeneyo ongena kuyo kusiya fika isikhathi sokuvalalisa.

- Ijaha licela ukuzebona intombi
 - Nxa ifuna iyavuma – ingathini?
 - Inxa ingafuni kudingeka ukuthi ikhethe amabala alobuntu angeke alimaza lelojaha – yiwaphi?
- Intombi ingabuzwa nguyise ukuthi ijaha belidingani
 - Ithi uyazihambela – kuveza ukuthi intombi iyalifuna ijaha, uyise kuhle kumlungisele ukuthi aqale inkulamo logogo kumbe labodadewabo ngomntwana.
- Nxa isikhombile
 - ibikela ugoto ukuthi atshele abazali ukuthi isikhulile – kuyinhlonipho isenzela ukuthi bangamangali nxa bebona ijaha selihlala livakatsha
- uyise angayibuza ngejaha nxa isikhombile
 - iyatsho iqinisa ukuthi iyalazi ukuze babone ukuzimisela kwayo
- nxa ijaha selifuna ukulala lentombi lingakayithathi
 - ihlanganisa imilenze yale ukuqethuka
 - kumele ikhethe amabala okwala angasoze alimaze ijaha kodwa aqotho ngokungafuni kwayo – ingathini?
 - Ibalekela ihlazo lokuzithwala kungafanelanga
- Nxa isifuna ukwenda
 - Ibikela ugoto kumbe uyisekazi – kunceda ekuthini kwenziwe amalungioselelo okuthi iyevalelisa – kuyinhlonipho

- Nxa ivalelisa ijaha
- Ithi isikhulile isifuna ukuhamba lelizwe – yindlela yokutshengisa ijaha ukuthi izimisele kulo
- Nxa ivalelisa izihlobo – iyatsho ukuthi iyangaphi – kutshengisa ukwazisana njengezihlobo

Yethula imibono yakho ngokulondolozwa kokuthula langezindlela zokuxazulula izingxabano ezazisetshenziswa endulo.

- Inkosi yayifaka izinduna ezigabeni ezihlukeneyo – zazixazulula izingxabano zigcine ukuthula zizizwe ziseduze lenkosi
- Ukulandelwa kwamasiko kwakusenza kungabikhona ukukhubana – eg ukungayi emacansini abantu bengakathathani kwakwenqabela ukuzithwala okungalungiselelwanga okwakungaxabanisa izimuli
- Inkosi yayisisela izinduna zayo ukuze zamukele umbuso wayo zingahlamuki
- Ukusiselana inkomo njengezakhelani kwakuletha ukulingana lobuhlobo kuvimbe ubusela
- Ukugcina imfihlo kwakuvimba izingxabano
- Izindaba ezilulaza isimilo somuntu zazingakhulunywa – kwakusehlisa izingxabano
- Abaxabeneyo babengehlukani bahlalelane khatshana
- Kwakungenzeka ukuthi onguye odale ingxabano axotshwe nxa indaba isehlula ukuxazululeka
- Esigabeni umninimuzi wayexazulula izindaba encediswa ngamadoda awakhethileyo
- Ehlule umninimuzi yayidluliselwa enduneni eyayincediswa ngamadoda ewakhethileyo
- Kwakusiba lomfazi wenkosi kuzigaba ezehlukeneyo owayesiba lilihlo layo
- Ukuhlawulisana kwakukhomba ukuphela kwecala
- Abonelaneyo babengaxoxisana ngokubaxabanisayo balungise

Hlaziya izinkulumo zikayise wentombazana maqondana lomntwana kusukela ekhonjiswa kuze kufike ukuyakwendiswa kwakhe. Zisitshelani?

- nxa ijaha lifika lizebona intombi
- nxa ubaba engalifuni uyalixoxisa engalikhululi lize lizihambe – kungaveza ulunya lukababa ngoba engamalela ngesihle amekele ahambe
- angalalela ngokuhle alitsehele ukuthi bona kabadlelani labakwalo – kwephula ijaha umoya kodwa kuveza ukuthi ubaba uqotho
- nxa elifuna uzalilayela endlini yamantombazana – kunika ijaha ithemba
- umfana nxa esehambile kodwa ubaba engamfuni
- uqonqosela amankazana ukuthi amtshale engasaphenduki ngoba bengadlelani lemuli yakwabo – ukumvumela angene ekuqaleni kutshengisa Ubuntu ngoba ubaba engafuni ukumzisa ubuhlungu umfana.
- Nxa esebonile ukuthi inkazana sikhonjiswa wayeqala izingxoxo ngemizi angahambelani layo ukuze layo izwele lapho – kuveza uthando lukababa ongafuni umntwana awele endaweni engayisiyo.
- Nxa ugogo engambikela ngendaba yomntwana ukuthi sekhombile – wayembuza ugogo ngalelojaha – kuveza ukukhathalela ikusasa lomntwana.
- Esebikelwe ngugogo wayebiza inkazana ayibuze ngejaha – udinga ukwazisisa ngokuzimisela komntwana okuveza ukukhathalela ikusasa lakhe
- Ijaha laliqonqoselwa ukuthi nxa libuya ukuzebonwa libuye lomuntu omdala kukhulunyiswane – ubaba ufuna izinto ziphathwe ngendlela yenhlonipho njalo uvikela umntanakhe
- Ubaba wayeqonqosela ugogo ukuba aqonqosele ijaha ukuthi lihloniphe umuzi lingafiki ebusuku njalo livalelise kusakhanya – uvikela umntwana njalo ufuna izinto zenziwe ngenhlonipho

- Engatshelwa ukuthi umntwana sefuna ukuyakwenda wayesala ethi useselusane aqambe lezinye izinto athi kazenelisi – yimizamo yokumtshengisa umntwana ukuthi umendo ufuna ukuzimisela lokusebenza nzima.
- Wayetshela umntwana ukuthi kayevalelisa – kuveza ukuthi wayelibusisa inyathelo lomntwana
- nxa sesiyakwenda ubaba wayebiza izihlobo kukhethwe abantu abazakuya mendisa - kuveza ukuthi uyamkhathalela umntwana akugcizelela ngokumcola.

Landisa ngenguquko esikhona emasikweni esiNdebele.

- Kudala umfana wayekhombisela inkazana ngekhaya kodwa lamuhla sekuhlanganwa loba ngaphi kukhonjiswa – imbangela yini?
- Babekhombisa befuna ukuthatha kodwa khathesi sebefuna ukutshaphaza badlule
- Endula indaba yemacansini yayizilwa ingajahwa kodwa khathesi isijahwa – yindaba
- Nxa inkazana ingathomba yayibikela ugo kumbe uyisekazi kodwa khathesi kayibikelimuntu – kungaba kungenxa yokungabikhona kukagogo loba ubabakazi kumbe ulwazi lokuthi benzeni sebeluthola ezikolo njalo lwehlukene kulolwendulo
- Nxa kufiwe endulo besiyakhalela babethi bahlanganisa amehlo labanye kodwa lamuhla sebexhawula – kungenxa yokuxubana kwezizwe lemikhuba
- Isivakatshi yiso esasikhulunyiswa ngabomuzi kodwa namuhla yiso esibingelelayo – kungabe kusenziwa yikuxubana kwezizwe lemikhuba
- Isivakatshi singafela lapho okuchatshwa khona umfula sasingcwatshwa lapho esifele khona kodwa khathesi akusenjalo
- Kwakudilizwa umduli emsamo nxa kukhitshwa isidumbu kodwa khathesi akusenzi ngoba ukwakha sekulendleko ezinengi
- Umamazala wayengahlangani lomkhwenyana kodwa khathesi abanye abaselandaba lawo umkhuba ngenxa yokuxubana kwezizwe lemikhuba
- Ozithwale engakendi wayesendiselwa exhegwini kodwa khathesi ngenxa yamalungelo bayazikhethela
- Umuntu wayengcwatshwa eqotsheme kodwa khathesi sefakwa ebhokisini
- Osesiyakwenda wayebhoda evalelisa izihlobo kodwa khathesi sekunzima ngenxa yezindleko
- Umuntu wayengcwatshwa emzini wakhe kodwa khathesi sekulamangcwaba kawonkewonke mhlawumbe ngenxa yezinhlelo zokuhlaliswa kwabantu ezintsha
- Abazithweleyo babeziliswa ukudla thize kodwa lamuhla sebezidlela
- Ubaba wayesemukela ijaha elizekhombisa umntwana kodwa lamuhla sexabana lalo mhlawumbe ngenxa yokuthi sekugcwele amaqili
- Oswela inzalo wayezalelwa ngumnawakhe kumbe umntwanomnewabo kodwa ngenxa yamalungelo lemikhuhlane emitsha akusenziwa
- Ofelwe yindoda wayengangenwa yisihlobo somufi kodwa namuhla ngenxa yamalungelo lemikhuhlane sekwatshintsha
- Ukuklekla kwakuluphawu lwamaNdebele kodwa kalusekho
- Ezimfeni kwakungadliwa inyama elesawudo kodwa khathesi isidliwa nje
- Umalukazana lomamazala babengadlalani baze baphane izipho kodwa khathesi sebedlelana nje.

Xoxa ngemikhuba ephathelane lemfa. Ibuveza njani Ubuntu?

- Owesifazana angafelwa uzila okwesikhathi eside lanxa impahla ingadabaka ulinda isikhathi size sifike engayitshintshanga – kuveza inhlonipho kumufi kwenze abesilisa bamxwaye lanxa nje kuyikumhawulisa kakhulu ngokutshona edatshukelwe.

- Indoda igqoka ibhetshu elingelaboya igqize lemizi – kuveza inhlonipho kulo omtshiyileyo
- Indoda izila okwesikhathi esifitshane kulomfazi – okuveza ukuthi umphakathi uqhuba phambili imizwa yabesilisa kuleyabesifazana okuyinto engakwabithekiyo elobandlululo
- Umuntu angafa kwakubikelwa izihlobo – kuveza ukwazisana njengezihlobo
- Nxa kufe iphahla umfana kuthiwa uyekwelusa inkazana kuthiwe iyekukha imizi – yikuzama ukududuza iphahla eliseleyo ukuze likhohlwe
- Isihambi singafela emzini wabantu kwakuthunywa umuntu ayebika kuthi nxa kuchatshwa umfula singcwatshwe kulowomuzi – ukuthuma umuntu ayebika kuveza inhlonipho lokusebenzelana ndawonye ukumngcwaba lapho kuveza ukwazisana lokwamukelana
- Ukugezisa amakhuba lokunye okusetshenzisisweyo kubuyiselwe kubanikazi ngesikhathi kuveza Ubuntu bokuncedisana, ukukhathalelana lokubonga
- Nxa kufiwe kwakuphangiswa ukuyakhalela – kuveza ukuhlalisana kuhle lokuzwelana
- Nxa kuzavuka kuyiwangcwatshwa omakhelwana babelindisa abafelweyo isidumbu ubusuku bonke – kuveza ukuzwelana, ukubambana lokuthandana
- Ozele umntwana efile kwakuthiwa uswele

Hluzisisa imilayo ephiwa inkazana esanda kuthomba lesisiyakwenda. Imnceda ngani leyo milayo?

- Utshelwa ukuthi aziphathe kuhle okulamadoda khona – kumakhela ukuhlonipheka lesithunzi
- Ukhuthazwa ukuthi akhuthale angabi livila – kumenza amukeleke emendweni abe lesithunzi
- Ulaywa ngokuthi indlu iphathwa njani – kumenza akhuthalele ukuhlanzeka njalo agxile emendweni abe lesizotha
- Ulaywa ngokuthi aphaathe njani indoda – kuzamenza athandwe kakhulu ngumkakhe njalo agxile emendweni wakhe abelesizotha
- Ulaywa ngokuthi aphaathe njani abantwana – kuzamenza enelise ukuvikela abantwana emikhuhlaneni lezingozini njalo ondle abantwana abalembeko
- Ufundiswa ngokubamba kuhle izinto – kumnceda ukuthi alondoloze kuhle impahla yakhe leyabanye
- Ifundiswa ukuthi igazi layo lokuthomba akumelanga libonwe ngabantu ifundiswe njalo ukusebenzisa kuhle ingcotho lobubendle – ifunda ukuhlanzeka lokugcina imfihlo
- Ilaywa ukuthi kumele ilandele kuhle amasiko – kwenza ingaphambuki yenze okungakhangelelwanga emendweni
- Ifundiswa ukuthi ihloniphe umkayo imguqele – kuzakwakha ubudlelwano obuhle lomkayo
- Ilaywa ukuthi ingayi emacansini ingakendi – kuzenza ihlonipheke lapho ezendela khona
- Ilaywa ngezinto okuzamele izizile ingaya emendweni - kuzenza yamukeleke kuhle izotho emendweni wayo
- Ilaywa ngokuqakatheka kwenzalo kwabozala – kuyakhela isithunzi kuyigxile emendweni
- Ilaywa ngokuqakatheka kokubekezela emendweni – kuyayiqinisa njengomama kuyenze imele umuzi wayo

Hluzisisa izinkulumo ngomntwana kumbe lomntwana ozithwale engakendi. Zazinxwaneleni lezo zinkulumo?

- Nxa kusolelwa ukuthi uzithwele ubuzwa ngunina omncane, ugogo kumbe uyisekazi – kudingwa isiqiniseko ngesimo sayo ukuze kudingwe inyathelo eliqondileyo
- Laba ngabantu akade evele esesondelelane labo kakhulu
- Oselependulo ngesimo senkazana ubikela imuli – kwenza kuncediswane ekuphumeni lesu eliqondileyo ngomntwana ukuze kungabi yisinqumo somuntu oyedwa

- Yayibuzwa inkazana ukuthi isisu isithethe ngaphi – babekwenzela ukuthi bazi ukuthi baqonde ngaphi nxa kumele bayebika isisu kumbe nxa bengalifuni lelojaha bacabange ngendaba zokwendisa umntwana
- Abadadala babexoxisana ngokuzithwala komntwana – babedinga ukuthi kukhulunyiswane labakojaha kumbe ayekwendiswa
- Intombi yayibikelwa ngesinqumo esasithethwe ngabadala – kwenzelwa ukuthi izilungiselele ukungena kumumo omutsha
- Nxa kuyiwa bika isisu kwakungathunywa unina omncane wentombi lamazwi athi “sizoletsha impahla zenu.” – kwakuyikuletha udaba ngendlela elobuntu bengazange baluthi bhadla njalo kunxwanelwe ukutshengisa abakojaha ukuthi kabathabanga ngokwenzakeleyo
- Abakojaha babephendula bedinga ubufakazi bokuthi umthwalo ngowabo ngamazwi athi “impahla zethu ziphi? Sitshengiseni elisibamba ngakho.”
- Nxa babelabo ubufakazi babesitsho ukuthi “silibamba ngalokhu”, okwakungaba yibuhlalu loba yini okugqokwayo okwejaha
- Ijaha lalibuzwa ukuthi impahla liyayazi yini, lingavuma kutsho ukuthi isisu lisivumile – ukubuza ujaha kwakuyikudinga isiqiniseko sokuthi isisu ngesalo
- Nxa ijaha bengalifuni abakontombi babekhulumisana labakoxhegu okuzendiselwa khona intombi ngokuthi umntwana ozazalwa kuzathiwa ngowalapho – kwenzelwa ukwakhela intombi isithunzi
- Kwakukhulunywa ngomntwana ozazalwa kuvunyelwane ukuthi angazalwa akhule uzahanjiswa kwabo kantombi agcinwe mhlawumbe ngumalumakhe – mhlawumbe kuyikumakhela inhlonipho ngoba lowomntwana engaphathwa njengehlazo emendweni

Imidlalo eyayidlalwa ngabantwana yayiphathisa njani ekhululeni kwabo

- Ukucabanga ngokujulileyo
- Ukukhaliphisa ingqondo
- Ukuqina umzimba
- Ukuzivikela
- Ukusebenzelana kuhle labanye
- Ukuncedisana
- Ukuba yingcitshi ekunembeni
- Inhlonipho
- Ukukhuluma kuhle
- Ukuthandana /ukwamikelana
- Ukwazi ukuzikhethela
- Ukwehlukana phakathi kokuhle lokubi
- Ukuhlala uqaphele
- Ukuhlakanipha
- Ukwazi umvuzo wokuncintisana
- Ukuqondisa izingxaki
- Ukugcina imfihlo
- Ukuthembeka
- Ukwenza inhlelo ezicacayo / ukuhleleka
- Ukuthatha izeluleko / izixwayiso
- Ukulalela

**“AmaNdebele ngabantu ababenqineka ukuthi abantwana babe lemizi evundileyo bengakhula.”
Kuvela njani kulolugwalo?**

- Amankazana ayeqapheliswa ngemizi akungamelanga bakhangelele ukuthathwa kuyo

- Nxa babesendisa abantwana babesiba lesiqiniseko sokuthi kazukuhlupheka ngokumendisela endodeni enothileyo
- Nxa inkazana isikhombile kwakuthiwa ijaha libuye lomuntu omdala izevela ukwenzela ukuthi kungabi lamaphutha ekuthandaneni kwalaba bobabili
- Umntwana nxa esesiyakwenda wayelaywa ngokuthi aziphathe njani emendweni
- Nxa umntwana ezithwale engakendi kwakubikwa isisu ukuze kubonwe inyathelo elingathathwa mayelana lomthwalo wakhe
- Intombi ezeephinda imikhondo yayiphiwa amacebo ngendlela zokulungisa ingxaki esike yahlangana lazo emendweni langokuphilisana lomdeni omutsha
- Intombi eswela inzalo yayimiswa ngezihlahla kumbe iphiwe umnawayo kumbe umntwanomnewabo kuthiwe ayemzalela
- Ijaha elalingelanzalo kwakuqoqwa ukuthi umnawalo kumbe umzawalo alizalele ukuze kube labantwana ekhaya
- Ubaba wayedonsela umntanakhe ihlahla nxa esephuma umuzi amncedise ukubethela isikhonkwane kulungiswe langendaba yomthuso ledibisi
- Amankazana angathomba ayesenziswa imikhuba ezabenza benelise ukumela ubunzima bemendweni njengokufakwa esizibeni khona kuqanda
- Emva kokuthomba amankazana ayelaywa ngendlela zokuziphatha ukuze bangoni ubuntombi babo besekubaphambanisela ikusasa
- Nxa intombi iyende ingagcwalanga yayikhitshelwa inkomo yokuyigcwalisa ukuze igxile imendweni wayo kuvalwe lelohlazo
- Inkazana yayifundiswa ukuphatha impahla ukuze ilondoloze kuhle impahla yayo ingenda
- Umfana angathomba wayelaywa ngamadoda ngendlela yokuqhuba ubujaha bakhe ukuze abayendodandoda kusasa
- Amajaha ayefundiswa imisebenzi eqondane lamadoda njengokubiya, ukugamula lokusenga

Landisa ngemikhuba eyayisenzelwa abantwana abangamankazana nxa bengathomba.

- Ugogo nguye obika ebazalini ukuthi umntwana sethombile
- Inkazana esithombile yayibonakala ngokuguquka isibanhle njalo isibabutshelezi
- Ugogo wayethatha ukhalo lwayo aluqumise emnyango besekuthiwa unina loyise balweqe ukuze ingabulawa lukhalo
- Ugogo wayedinga amadudu emvukuzane amathathu kuthiwe anyathele amabili kuthi elesithathu alisikize ebala amalanga akhe okungena esikhathini
- Kwakuthathathwa igazi lokuthomba lihlanganiswe lemithi besekuyiwa emfuleni enze ngalo amachatha amathathu edwaleni elinganisa lenani lensuku afuna ukungena ngalo esikhathini
- Kwakusenzeka ukuthi amankazana athombe sikhathi sinye ebusika ahlanganiswe kuhanjwe lawo esizibeni akuseni bafakwe khona. Labo abasebathomba phambi kwabo babehanqa lesosiziba bethwele inswazi ukuze lo ofuna ukuphuma atshaywe ngazo
- Nxa besemanzini ogogo babebasa umlilo omkhulu ukuze bangaphuma bothe nganxanye belaywa ngotshintsho oselukhona empilweni zabo
- Sebevela emfuleni inkazana ingakangeni ekhaya umnewabo wayeyishaya ngoswazi oluncane kuthiwa seyitshaya okokucina
- Amankazana ayethombe sikhathi sinye eyengenzelwa idili lokudunduzela ngesikhathi bevela esizibeni batshone behlabela besigidela
- Abanye abazali babesenelisa ukwenzela umntanabo idili lokudunduzela eyedwa
- Ugogo wayesenzela inkazana esithombile umkhuba wokubambisa ngokumbulalela iqhaga ezandleni ukuze alahliswe ubuntwana bokubamba impahla zisiwa okungamqedela impahla yemendweni
- Inkazana yayilaywa ukuthi iziphathe njani phambi kwabesilisa

- Yayilaywa ukuthi isebenzise njani ingcotho lobubendle ukuze igazi layo lingabonwa ngabantu

Landisa ngezibonakaliso zokuthomba emfaneni langemikhuba eyayisenziwa nxa esethombile.

izibonakaliso

- Ubonakala ngokuba lenkobe ebusweni
- Uyaphuhla
- Kuguquka ilizwi abhonge
- Uba lolaka emankazaneni labodadewabo
- Uba lobuqhwaga athande ukulwa
- Uyaziphuphela – uphupha elele lenkazana engakathombi kumbe isalukazi abesezingcolisa ngobulisa
- Omunye obelephupho wayevuka ekuseni ame esangweni lesibaya abantu bahle bazi ukuthi sethombile
- Ungavuka ekuseniseni aye esibayeni avulele inkomo ahambe lazo emadlelweni athi angabuya lazo ntambama angangeni ngekhaya ahlale esibayeni

Imikhuba

- Uncediswa ngumalume, ubabomncane kumbe ukhulu
- Ubulala amabele ngemizaca yenduku
- Uyazithunga umsipha ongaphansi kwenhloko yesitho sobulisa ukuze angezwa ubuhlungu nxa elala lowesifazana
- Izinyanga zimdlisa imithi yokumqinisa lokumupha inhlanhla
- Uyalaywa ukuthi uhloniphe angoni abantwana babantu
- Ufundiswa imisebenzi enjengokugamula, ukuthena, ukubiya
- Ufundiswa indlela yokuhlala ngayo lokuthi kumele ahlale ephethe induku lokuthi ibanjwa njani
- Usehlonitshwa ekhaya kasabizwa ngebizo kodwa sebizwa ngokuthi 'mnewethu'.

Ugwalo lolu lukuveza njani ukuthi esikweni lamaNdebele abantu besifazana badliswa imbuya ngoluthi?

- Umfelwakazi wayezila isikhathi eside kulendoda
- Ekulotsholweni komntwana umama wayephiwa inkomo eyodwa kodwa ubaba athathe ezinengi
- Umfazi kwakukhangelelwe ukuthi angafelwa angenwe yisihlobo sendoda engafuni lokho wayemele asuke atshiye konke
- Intombi ingazithwala ingakendi yayisendisela exhegwini kungadingwa ukuthi yena uzwa njani ngalokho
- Nxa kusabiwa ilifa amankazana ayephiwa inkomo eyodwa kodwa abafana bephiwa ezinengi
- Abafazi esithenjini babehlala isikhathi bengayiboni indoda kodwa kukhangelelwe ukuthi babekezele
- Ukuze umntwana ayekwenda imvumo kwakumele iphume kuyise, okanina umbono wawungaqakathekanga
- Intombi nxa isanda kwenda kwakungamelanga idle okunye ukudla njengochago aze aphiwe imvumo nguninazala
- Inkazana ingathomba umnewabo kuthiwa wayeyitshaya ngoswazana okokucina okuveza ukuthi babehlala betshaywa
- Nxa indoda ingafa umfazi wayengalali ize ingcwatswe kodwa kwakungafani endodeni
- Umfazi wayengahlabi isifuyo engabikanga endodeni kugoqela lalezo ezingezakhe mathupha

- Babebandluluwa ekudleni inyama: kwakulenyama yabafana labobaba kodwa okuqondane labomama yisadijana lesifuba kuphela inyama egcwele amafutha

Veza ulwazi lwakho ngokuthethela utsho lokuthi kwakuthethelelwani njalo kwakuthethelwa njani

- Kwakuyindlela yokuxhumana lamadlozi ebongwa ngokuhle akwenzileyo kumbe kucelwa uncedo kuwo nxa kulohlupho
- Nxa kungelahlupho kuthethelwa emva kokukubhula utshwala buphekwe ngamabele abuthwa ekucineni athiwa ngumuhlwa
- Amabele ayabanjwa athanjiswe kubikelwe abaphansi ngawo langesifuyo esizabulawa
- Utswala bomthethelo babuphekwa ngumfazi omdala nxa kusesithenjini
- Ekuseniseni umnimuzi wayehamba ayebikela inkomo yamadlozi okuyinkunzi kumbe inkabi emnyama
- Inkomo le yayingatshaywa njalo ingabotshwa
- Ntambama kwakubuthanwa phambi kwendlu enkulu umphathinkezo amumathe utshwala akhufule abike ngokwenzakalayo kwabaphansi njalo abonge
- Wayethatha iqhaga lotshwala achithele phansi achithe legwayi njalo esipha abaphansi
- Isifuyo esizahlatshwa sasilethwa sibikwe kwabaphansi
- Inyama ezadliwa lotshwala legwayi kwakulala endlini yamadlozi kuthi utshwala bungavuka buphuphume igwebu bachitheka kuthiwe amadlozi avumile alele enatha
- Ekuseni kwakuvukwa kunathwe amaqhaga aphungukileyo kuthi abanganathiyo baphongkufaka umlomo nje
- Kwakusenziwa okufanayo ngegwayi
- Kungaphela kwakubizwa omakhelwane kutshone kudliwa kunathwa
- Kwesinye isikhathi kwakuthethelwa ngoba kuvele uhlupho olunjengokufa kwezifuyo, imikhuhlane, abantwana beswela imendo lokunye
- Kwakuyiwa enyangeni ezazisitsho ukuthi amadlozi kathabanga besezisipha abantu izeluleko zokuthi bathethele njani

“Hatshi mfana wami. Thina abakozibani (beqamba uyise ngebizo) kasihambelani labo.”

- a) Amazwi la asitshelani ngenkangelelo zabazali ngekusasa labantwana babo? (12)
- b) Ngokubona kwakho amazwi la emukeleka njani ejaheni eliwatshelwayo (8)

“Hiya ntombi,ngitshiya ingqobe kuwe, kusasa ungangikohlwa, ngizahambela khona ngapho.”

- a) Kuyabe sekutheni nxa kutshiwo la amazwi njalo owatshoyom uhlonipha yiphi imikhuba? (8)
- b) Veza ubunzima amajaha ayehlangana labo endulo nxa ekhombisa. (12)

“Hamba uyevalelisa kiwo umduna wakho lowo.”

- a) Amazwi la avela kuyise wentombi. Veza ukuthi kuyabe sekutheni aze awatsho la amazwi njalo ukuthi avezani ngaye. (8)
- b) Xoxa ngokuvalelisa kwentombi (12)

“Dingelani ngapha.”

- Landisa ngendlela yokuthathana okukhulunywa khona la amazwi.

“Sizeletha umthwalo wenu.”

- a) Amazwi la ayetshiwo ngubani njalo eqondiswe kubani? (4)
- b) Xoxa ngokubikwa kwesisu. (16)

“Nanko amaseko akho.”

- a) Xoxa ngomkhuba wokubekwa kwamaseko. (8)
- b) Landisa ngempilo kamalokazana osanda kwenda uveze imikhuba ayenzelwayo lalokho okumele akizile (12)

Veza ulwazi lwakho ngokulandelayo

- 1) Inkazana isigcwele / isivuthiwe (3)
- 2) Ukweqa ukhalo (3)
- 3) Ukunduzela (3)
- 4) Ukubambisa inkazana izinto (4)
- 5) Ukuzithunga komfana (3)
- 6) Ukuziphuphela (4)

“Inyoka yethu iqome khonapha ekhaya; ilobungoma izethwasiswa.”

- a) Xoxa ngezibonakaliso lokuthwasiswa kwedlozi lesangoma.
- b) Landisa ngokwendiswa kwesangoma langendlela isangoma esisebenza ngayo

Landisa ngokuphenjwa komuzi esintwini

Landisa ngokufuywa kwenkomo esizweni samaNdebele njengoba kuvezwe egwalweni ‘imikhuba lamasikom amaNdebele’

Wawuqhutshwa njani umbuyiso endulo.

Landisa ngendlela okwakubelethiswana ngayo endulo utsho lokuthi umdlezana losane babephathwa kanjani.

Wawuqhutshwa njani umthimba wesintu

Cacisisa ngezindlela zokuthathana ezehlukeneyo

Imvelo yayiphathisa njani empilweni yamaNdebele. Tshengisa lokhu usebenzisa lolu ugwalo.

Lanxa babengelalo ulwazi lwesayensi lwalezi insuku, okhokho babelalo ulwazi olutshengisa inkalipho yabo. Veza lokhu usebenzisa lolu ugwalo.

Landisa ngemikhuba yamaNdebele ephathelane lokufa lokungcwatswa

Xoxa ngabelaphi abehlukeneyo uveze indlela ababethola ngazo lobo belaphi langendlela ababephathwa ngayo umsebenzi wabo.

mangoro 0773678713